

Marku Deuxu Rybe Wihikỹ Tỹmyra, Marku Tyyritidỹỹdu

¹ Kaki heka Rybe Wihikỹ juhu kaki roire. Ka Rybe Wihikỹ Jesuisi Kristumy heka rarybereri. [Tii heka Deuxu Riðre rare.] ² Myheka Isaia tyyriti-ki kia rybe rỹire:

Deuxu rarybere: —Boholake, waðwàdàdu ariteònykre akomy. Tii ary riwinykre.

³ Tii ryrymyhỹ bederahy-ki: —Kai biwinykre rywihikỹ Wanyrỹ dee. Òbiti tamy biwinyke.

⁴ Joaõ Sebedỹỹdu bederahy-txi taile ihỹmyhỹ rybe tyyriti ritỹnynymyhỹ. Tii sebenaõmy riòbitinymyhỹ. Kia riwinykemy ixi-txi tõhõti reakemy taðraru-txi kia Deuxu ritakemy. ⁵ Ibutumy Judeia bede ludu mahãdu Jerusalẽ hãwã mahãdu-wana rare bederahy-ò. Taðrarumy relyymy rahudi tahe, Joaõ risebenyre bero Jordaõ-ò. ⁶ Joaõ rexityynyre kamelo rade tyy-di, tule iròdutyy wereysana iwetya-ki roimyhỹre. Irỹsỹna raremyhỹ, seihikỹle bidi-wana. ⁷ Joaõ rybe tyyriti ritỹnynydyỹmy rarybemyhỹ: —Jiarỹ aõ aõkõ rare, waruru-di aõkõ. Inyõ wahewomy kanakre tahe iruru waruru ratyredỹỹnadu rare. Waratyre awityhyke. Jiarỹ riwaixỹrunymy watxireri iwataana ese-ki. ⁸ Jiarỹ bedi arãsebenyre. Tii heka Deuxu Tyytybytyhy-di arãsebenykre.

⁹ Kiatxu Jesuisi nade Nazare Kalileia bede ludu-ribi. Joaõ tii risebenyre Jordaõ bero-ò. ¹⁰ Tii

bera-ribi dotuodeu biuwetyky rarayre. Deuxu Tyytybytyhy heka bòtòe wese tamy dobehede. ¹¹ Deuxu rybe-ò roholare biu-ribi: –Kai heka Wariòre waluu tate. Adi wadeysawihikỹreri.

¹² Aõwesele Deuxu Tyytybytyhy heka Jesuisi riteònyre bederahy-ò. ¹³ Tii bederahy-ki 40 txumy bede idi rỹire. Satanasi aõhòkỹmy risỹnymy Jesuisi raremyhỹ. Iròdu deborehekỹ tai rỹiramyhỹ. Yjureny iyrubudỹmy rehemynyre.

¹⁴ Joaõ rare ròtenawo-ò, idita Jesuisi Rybe Wihikỹ ritỹnynykremy dehemynyde Kalileia-ò. Jesuisi heka Rybe Wihikỹ ritỹnyndỹre: –Deuxu Iòlòna bede-ò wahe. ¹⁵ Jesuisi rarybera: –Bedeỹnanaha bede reara. Deuxu Iòlòna bedehede iòhòra. Kaiboho ixi-txi òhõtirenny reake aòrarurenny-txi bityhynybenyke Deuxu Rybe Wihikỹ.

¹⁶ Jesuisi aho ijàti-ki rariamy ihỹmyhỹ. Tii robira tuurenny taseriòre-wana ihỹmyhỹ-ò, Simaõ Pedro, Andre-wana. Tiiboho rehumy ihỹmyhỹrenny rià-di. Tiiboho heka waxidu roire. ¹⁷ Jesuisi rarybera tamyrenny: –Kaiboho bodoibedenyke wahemy. Tai tahe araerynanyrennykre inny rymykemy utura temyta wese. ¹⁸ Tahe aõwesele rià ririrennyre. Roire Jesuisi-wana. ¹⁹ Iko roire Joaõ, Txiau, taseriòre-wana. Tiiboho heka Zebedeu riòre roire. Tiiboho hãworo-ki ratximyhỹrenny rià riywinymyhỹrennyre. ²⁰ Jesuisi tamyrenny rarybera: –Wahemy bòdòike. Tahe aõwesele tybyrenny ririrennyre teòdu-wana. Tahe tiiboho roire Jesuisi-wana ierydỹnyamy roirekemy.

²¹ Tiiboho rirònyrennyre Kafanaõ hãwã-ò. Judeu

mahādu aōmysyḍḍyḥna txu aōkō. Jesuisi ralore judeu mahādu dohodḍyḥna heto-ò eryḍḍyḥmy.
²² Kowa mahādu urile bedede riòtiinyre irybe-ki. Tii heka irurutyhy-di rierynanyre, ieryḍḍyḥdu mahādu wese aōkō rohodḍyḥnanymyhḥre. ²³ Kia bedeu heka hābu tyytybybina-di ratximyhḥre dohodḍyḥna heto-ki. Tyytybybina hābuwo-ribi rarybere: ²⁴ —Aōhebo wadi botḍyḥnykre Jesuisi Nazare ludu. Biwahubenykre aōbo? Jiarḥ araeryre mobo kai tatehe, kai heka hābuōtyhy inatyhy Deuxu-ribi kai tate. ²⁵ Jesuisi tarurumy rarybere: —Kai rybeōmyke. Iribi bōhōnyke tyytybybina. ²⁶ Tyytybybina hābu riatyre riworḥsḥworḥsḥnylemy. Tyytybybina raryre rybe iteremy, idi rōhōnyre. ²⁷ Ibutumy iny ribedeòtiinyre. Ritḥyḥraxinyre ijō: —Aōwexe ratxireri, aōeryḍḍyḥnatḥmyrabo ratxireri. Tii riteōnyre tyytybybina. Tyytybybina Jesuisi rityhynyre. ²⁸ Ityhynina Kalileia bedede bedemy reare.

²⁹ Tahe dohodḍyḥna heto-ribi rōhōnyrenyrene. Jesuisi, Txiau, Joaō-wana roirenyre Simaō, Andreboho heto-ò. ³⁰ Simaō riòre lahi roimyhḥ rubunamy. Tahe aōwesele tuu relyyre Jesusiko. ³¹ Jesuisi rimyre tebò-ki, tahe, aōwesele irubuna ixāwira. Idi tahe hāwyy tamyreny bedede redere.

³² Txu ralōmy rahudi, ibutumy tamy didydenyde inybina bina. Tule iny tyytybybina tamy didydenyde. ³³ Ibutumy iny hāwā ludu iheto ijō wirotyre. ³⁴ Tii ibutumy binana òta òta riywinyre. Sōwemy tyytybybina riòlòḍḍyḥnyre. Tyytybybina Jesuisi rierymyhḥre. Tai tahe Jesuisi riijōnyre tyytybybina rarybekeò.

35 Rudile Jesuisi rare bederahy-txi rexitòenykremy. 36 Simaõ, ijõ mahãdu-wana Jesuisi ijesityhymy roire. 37 Tiiboho Jesuisi raharenyre. Tamy rarybere: –Ibutumy iny arãijereri. 38 Jesuisi tamyreny rarybere: –Rokoikehe rekexinoranyrenyke hãwã wixira-ò. Jiarỹ tamyreny rybe tyyriti aritỹnynykremy. Iurenana tahe jiarỹ anade. 39 Jesuisi rare ibutumy Kalileia bedè-ò. Tyytybybina iny-ribi riteònyre. Tule dohodỹyna heto-ki tii rybe tyyriti ritỹnynyre.

40 Hãbu tyybina mahãduõ Jesuisi-ò nade. Tii tatiowotimy resere Jesusiko-ò. Tahe Jesuisi-ò hãbu rarybere: –Adee awikeki tahe, biwateytenyke. 41 Jesuisi juhu urile riwotòenyre. Tii hãbu ritorunyre. Tahe rarybere: –Wadee awire, atyy awimy relekre. 42 Tahe aõwesele ittyybina reytera. 43 Jesuisi hãbu riteònyre. Rarybere: –Kai tahe inyõdee rybeõmykre. 44 Kai bexiteòsinykre Deuxu aõmysỹdỹdu-ò. Iwese Moisesi ròerynadỹnyre wese, kai bexiteòsinykre. Kia heka inydee deòsinamy riteòsinyre. Kia iny rieryke timybo teytemy atximahãtemy. 45 Tahe hãbu rare ibutumy inyko relyyra. Kia heka Jesuisi tahe uritere hãwãhãkỹõ-ò ralòõhyyre. Tahe bederahykile rarire. Ibutumy iny tamy rare ibutumy bedè bedè-ribi.

2

1 Tiutxuõmybo Jesuisi dòòsede Kafanaõ-ò. Idi tahe rybe reare rehemynymy ratximyhỹ heto-ki. 2 Tahe iny, aõriòre aõkõ, tamy wirotyre heto ijò-ò. Tahe Jesuisi relyymyhỹ Deuxu rybemy. 3 Hãbu inaubiòwa heka hãbubina-di tamy

detyydenyde. Kia hãbu rawòronyire taumy-ki. ⁴ Jesuisi-ò rehemynyõhykylere iny sõwerekì. Tahe raòwònyrenyire idi heto ratyytyre-ò. Hetotyre riraynyrenyire tahe reru-di diberesedỹnydenyde byretyre-ki Jesuisiko-ò. ⁵ Jesuisi rieryre hãbu rityhynyrenyire, tai rarybere hãbubina-ò: — Waexi aòraru-ribi araixitarasadỹnyre. ⁶ Bede ywina erydỹ mahãdu rorukurenryeri, ixideele rarybemy rỹimyhỹre: ⁷ —Aõherekibo hãbu kiawese rarybereri. Tii iòwe òwelemy rarybereri. Deuxu dee aõbina binalemy rarybereri. Mobo tahe òraru-ribi iny ritake. Deuxule òraru-ribi iny ritake. ⁸ Jesuisile roholaõlere ihãrele rieryre aõmybo raryberenyire. Tai tahe Jesuisi tamyreny rarybere: —Aõherekibo kiawese tarybetenyteri. ⁹ Tibohe isiraõtyhyre, tuu ararybeke: —Aòraru-ribi anaixitarasadỹnyre ada myike, abyre bimyyke, mariake. ¹⁰ Kaiboho bierykemy Deuxu Riõre Hãbutyhyhykỹ irurudire iny òraru-ribi iny ritakemy. ¹¹ Tahe hãbubina-ò rarybere: — Boholake, myike, abyre bimyyke tahe makre aheto-ò. ¹² Tahe hãbu rỹire, tabyre rimymy tahe rare ibutumy inyru-ò. Ibutumy bede riõtiinyre tahe reàlãre Deuxumy. Ibutumy rarybere: —Tiu heka aõmy kawese rabiõhyymyhỹre.

¹³ Jesuisi rare ahohokỹ ijã-ò. Ibutumy tamy doide. Tii iny ribedeerynyre. ¹⁴ Levi, Afeu riõre, ronymyhỹ nierumynydu hetowo-ki. Jesuisi ibire-di rareò, tii robira. Jesuisi heka Levi-ò rarybere: —Waijoimy mynake. Tahe rỹimy reare Jesuisi ijoi-ò ralore.

¹⁵ Jesuisi taerydỹna-wana rorukure Levi

hetowo-ki. Tule nierumynydu mahãduõ rononymhỹre òrarudu-wana. Ibutumy riroximyhỹrenyre. Sõwemy heka kia iny mahãdu Jesuisi riheludunynrenyre. ¹⁶ Bede ywina erydỹỹ mahãdu, lahi rybe-di erydỹỹna mahãdu tuu robirenyra. Idi raryberenyre Jesuisi erydỹỹna mahãdu-ò –Aõherekibo tii riroxireri òrarudu-wana, nierumynydu-wana. ¹⁷ Jesuisi roholareu, tamyreny rarybere: –Iny ibinaõkeki tahe luaaidu tamy kanaõtyhy. Tahe iny ibinakeki, tamy kanake bina-ò. Òbiti mahãdu itxemy aõkõ anade. Tahe òrarudu mahãdu itxemy anade.

¹⁸ Joaõ erydỹỹna mahãdu, lahi rybe-di erydỹỹdu mahãdu-wana byreõhyky txuu tutyhyle rỹimyhỹrenyre. Tahe roire Jesuisi dỹỹraxidỹỹmy. Inyõ Jesuisi ritỹỹraxinyre: –Aõherekibo Joaõ erydỹỹna mahãdu byreõmy rỹiõmyhỹre. ¹⁹ Jesuisi rirawyõnyre: –Heriduõ, itxeredu-wana ratxireriu, byreõmy rỹiõtyhy tutyhylemy. ²⁰ Tiutxulemybo tahe heridu iribi kanatakre, tai tahe byreõmy kỹnyikre tutyhylemy. ²¹ Moheka tyytỹmyra dòbòna ritidikre tyytyby-ò. Idi inatyhymy dòbòna rayjakre tahe tyytyby sõwemy raykake. ²² Moheka òteti bederatyrube tỹmyra rihynymyhỹre iròdutyy walabuutybywo-ò. Idi tahe raberyrònymyhỹreu, urile iròdutyy walabuu raykake tahe irube rejujuke. Tule iròdutyy walabuu ribinadỹỹnymyhỹre. Irubetỹmyra awire heka iròdutyy walabuu tỹmyrarokile.

²³ Judeu elehydỹỹnareny txu Jesuisiboho ririranymyhỹrenyre maixõmo wesena oworumy, tai ierydỹỹna riòròmymhỹrenyre riroxirenykemy.

24 Tahe lahi rybe-di erydỹỹdu mahãdu rarybere Jesuisi-ò: —Aõherekibo aerydỹỹna mahãdu riwinyreri aõwidỹỹna aõkõ karare sabado txu. 25 Tahe Jesuisi tamy rarybere: —Kaiboho aõbo teriranyõletenyta tyyriti-di. Iwese Daviboho-wana aõhebo rotỹỹnyreri aõmy rekoarenymahãu, rama rahumyhỹrenyu. 26 Tii ralore hetotyhy-ò. Tai tahe orotxu sira ybina riyre, tule tamahãdu-ò riwahinyre. Kia tahe Deuxu deòdule rirỹsỹmyhỹre. Kia Davi aõhebo rotỹỹnyre Abiata heka Deuxu deòdu wedurau. 27 Jesuisi tamyreny rarybere: —Sabado txu heka rawidỹỹre inydee, iny tahe rawidỹỹõre sabado txu dee. 28 Deuxu Riòre Hãbutyhyhykỹ tahe sabado txu wedu rare.

3

1 Ixityre Jesuisi ralore dohodỹỹna hetowo-ò. Hãbu debò binahakỹõ tai ratximyhyỹ. 2 Lahi rybe-di erydỹỹdu mahãdu Jesuisi retehemyhỹrenyu. Jesuisi sabado txuule riteytenykeki, tiiboho rarybekemy aõbinabinakibo raharenkemy Jesuisi. 3 Jesuisi heka hãubina-ò rarybere: —Manake. 4 Tahe Jesuisi ijõ mahãdu-ò rarybere: —Aõwihikỹwidỹỹ awire ada aõbinalemy widỹỹ awire. Tibohe awire, itarasa-ki aõbo ada rubu-ki aõbo. Hãbu mahãdu urile riyryre. 5 Jesuisi tamyreny retehere raõbinamy. Tii heka iaõna aõna riwotòenyrenymyhyỹ. Jesuisi hãbu debò bina-ò rarybera: —Ebò biterenyke. Tai tebò riterenyreu, aõwesele awimy relere. 6 Lahi rybe-di erydỹỹdu mahãdu rara Iòlò Herodi mahãdu-ò. Tiiboho raryberenyre timybo tahe Jesuisi rirubunyrenyke. 7 Jesuisi rexitare

taerydỹña mahãdu wana aho-ò. Tahe sōwemy iny Judeia mahãdu, Kalileia mahãdu riheludunyre. ⁸ Ibutumy aōna aōna roholare Jesuisi riwinyreò. Tahe sōwemy tamy nade: Jerusalē hãwã mahãdu, Idumeia hãwã mahãdu. Iny Jordaō bero ijà-ribi tule nade. Tule iny Tiro hãwã, Sidō beà hãwã-ribi iòhòmy tamy nade. ⁹ Tahe Jesuisi taery mahãdu-ò rarybere: –Walawò bidiwykre. Iny sōwemy dori rehemynyeri. Kidiwawotōmonykre òsana. ¹⁰ Ibutumy bina mahãdu ibymy tebò reareri ixideytedỹmy. Urile iny sōwemy riywinyre dori. ¹¹ Tyytybybina Jesuisi reteherenyreu, urile iko-txi resere ryryeri: –Kai Deuxu Riòre tate. ¹² Tai tahe Jesuisi rarybere tyytybybina-ò, uritere iteòsidỹōmykemy.

¹³ Tii raòwònnyre bederatòòmy. Tahe taerydỹña-ò ryryre tibo tamy reòbykemy. Tahe tamy nade. ¹⁴ Tahe ierydỹña waòinatxi reuròmny rarunyre tii-wana rarekemy, rybe ritỹnynydyỹkemy. ¹⁵ Tule iruru-di rarekemy inybina riteytenykemy. Tule irurudikemy tyytybybina riteònykemy. ¹⁶ Kie ierydỹñanirenyre: Simaō, (tii tahe Jesuisi ijōni riwahinyre, Pedromy) ¹⁷ Txiau ijō, tii Zebedeu riòre rare. Kia seriòre Jesuisi rininirenyre, Boanejimy, inireny. Kia heka irybereny rare, Biumytxy riòrereny. ¹⁸ Ijō heka Andre, Filipi, Bartolomeu, Mateu, Tome, Tadeu, Txiau. (Kia Txiau heka Afeu riòre rare.) Ijō Simaō iwitxira, (tii brebuòmny rybe-ki, tasubedeluudu wahe.) ¹⁹ Judasi Isariò ijōre, kia heka Jesuisi riwahinyre iòludu-ò.

²⁰ Tahe Jesuisi nalode taheto-ò. Ixityre iny sōwemy tamy nade. Tai tahe Jesuisi

taerydỹna-wana riroxiõhyyre. ²¹ Idi tahe Jesuisi leinareneny itxỹtesana roholarenyreu, riõryrenyrene. Tiiboho raryberenyre: –Jesuisi itxỹte iõhõlere. ²² Bede ywina erydỹ mahãdu doide Jerusalẽ-ribi rarybemyhỹrenyrene: –Belisibu idi ratximyhỹre. Tyytyby wedu ruru-di tyytybybina iny-ribi riteõnyreri. ²³ Jesuisi inyko ijyymy relyyre: –Timy taheka Satanasi rexiteõnykre Satanasi. ²⁴ Iõlõna wiribi rexihitxinykeki tahe, rexihukre ibutumy wiludu. ²⁵ Tahe sỹro luduõ wiribi rahitxikeki, rỹiõtyhy. ²⁶ Satanasi rỹikeki reburemy, tii ixiõbitile rexirubunyke. ²⁷ Inyõ heka hãbu rurutere hetowo-txi ralõõtyhy. Tai rawasinykeki, urile iny ritaataake. Urile hãbu rataataakeki, irõõbymy iny rawasinyke. ²⁸ Inatyhy jiarỹ adee ararybereri, ibutumy òraru heka kanaixãwidinykre hãbu dee aõtxile aõbina binamy rarybemyhỹre. ²⁹ Kia inyõ aõtxile aõbina binamy Deuxu Tyytybytyhymy rarybekeki, tiu heka iòraru rataõtyhy. Kia òraru riwinyre tiiehyymy rarekemy. ³⁰ Jesuisimy kiamy narybedenyde: –Tii heka tyytybybina dire.

³¹ Tadi tahelỹna-wana nade. Tahe ahanakile ritamanyre. Tamy riteõnyrenyrene iòrysomy. ³² Iny sõwemy iwerora-di ronyre. Tahe Jesuisise-ò rarybere: –Adi aseriõre-wana ahanakile nyide, araijeneri. ³³ Jesuisi rarybere: –Mowe nadi rare, waseriõreboho rare. ³⁴ Juhu urile idi retehereri iwerora-ki. Tahe rarybere: –Betehekre, kaiboho ibutumy kaki nadiwesere, waseriõre wese toite. ³⁵ Inyõ aõna aõna riwinymyhỹkeki, Deuxu dee awira. Kia heka nadi, waseriõre roire.

4

¹ Jesuisi ròðsera ahobero ijà-ò iny dohodỹỹmy. Sõwemy iny wirotyre. Tai Jesuisi ronyre hãworo-ò tahe rexitaranyre ahoro-ò. Aho ijà-ò iny wirotyre ijohonamy. ² Tii aõna aõna sõwemy roerydỹỹnanyre ijyytyhydile. Kaa ijyymy tii relyyre: ³ –Boholake, alòbòròna-di dehudu rara alòbòrònamy. ⁴ Alòbòròna-di rehumyhyũ, ijõ ryro-txi resere. Tahe nawiixõmo rirore. ⁵ Ijõ rejujure manarutàsú-txi. Tahe aõwesele raumynyre iraruxiõlemy su dori ibutere. ⁶ Irauxiõreki, bede tòtee alòbòròna rimoenyre idi rurura. ⁷ Ijõ oworuty resere edehu-txi idi ruhunyre edewanale. Tai tahe ede-ò riòdesenyre tai raratynyõlere. ⁸ Ijõ resere su witxira wihikỹ-txi. Kia tahe raumynyre. Tahe sohoji oworutyõ 30my iraty raratynyre. Ijõ oworuty 60my raratynyre. Ijõ tahe 100my raratynyre. ⁹ Tii rarybera: –Kaiboho aõbo õhõtìdìrenyire, inatyhymy warybe-ò boholake. Adee awikeki, bierybenyke.

¹⁰ Iny robỹtỹreu, ijõ rarilere ierydỹỹna mahãdu-wana. Tiiboho rỹỹraxire Jesuisi-ò: –Aõhekemybo telyyta ijyymy. ¹¹ Jesuisi tamyreny rarybera: –Deuxu Iòlòna rybemy Deuxu araerynanykre. Kia heka tuu teeryõmahãte. Kowaboho-ò jiarỹ urile ijyymy relyyra. ¹² Tai tahe kia wesele relyyra.

Iny retehemyhỹkemy tahe robiõhyymyhỹre. Roholamyhỹre ta, rieryõhyymyhỹre. Tai tahe ralòkemy aõkõ, taòraru riixãwididỹỹnakemy aõkõ.

¹³ Tii tamy rarybere: –Kaiboho aõbo teeryõhyyletenyteri ijyy. Ihãre tahe timykibo

bierybenyke ijyy ibutumy. ¹⁴ Aloborodu rehumyhỹ alòbòròna-di. Kia oworuty heka rybe wese rare. ¹⁵ Oworuty ryijàti ludu heka iwese uriijohonadu wese heka rare. Rybe-ò roholarenyre, Satanasi nade rybe iwo-ribi ritakremy. ¹⁶ Manarutàsù ludu iwese iny reysamy roholareri. ¹⁷ Iny urihimyòle rarorehenymyhỹre iraruxi sòweòreki. Idihe rasirara irybe. Tule iny ralahatxinamyreki, ihyye tahe riixāwidinyra. ¹⁸ Ede rawo ludu iwese iny witxira roholareri. ¹⁹ Tiiboho taaõmydỹñnadile rōhōtinymyhỹre. Sōwemy nieru-di ratxikemy rexinohōtinymyhỹre ta nieru riitxenanymyhỹre. Ijō aōna aōnadile rexinohōtinymyhỹre. Kia aōna aōna rybe rirarutxinymyhỹre. Tai tahe rybe raratynyōmyhỹre. ²⁰ Suwihikỹ ludu iwese iny witxira roholareri. Kia inatyhymy rỹireri heka raratynyre alòbòròna raratynyre wese. Ijō raratynyre 30my, ijō tahe 60my raratynyre. Ijō tahe 100my raratynyre.

²¹ Tii rarybera tamyreny-ò: —Uritere loosòna ideõmyke butxi worawo-txi ada herina rawora-woõ-txi aõbo. Loosòna bidekre bedewiõ-ò. ²² Inyõ iwòteõmy aōna aōna tiiehyymy. Tiutxulemybo ratỹnykemy ihỹre. Iwòteõmy atximahābenyke aõu bodobikemy atximahātenyte. ²³ Kaiboho aõbo òhōtidirenyre, inatyhymy bohólake. ²⁴ Tahe Jesuisi tamyreny rarybera: —Kaiboho inatyhymy bohólabeny tamy taholamahātenyteò. Urihixina iwese teõteri wesele, kai biwykre. Ihāre tahe biwykre ijō teõta-ribi ritamy. ²⁵ Hābuõ ijōðikeki tamyle rawahidỹỹke, tahe hābuõ ijōðekeki iribi ratatyhyke.

²⁶ Jesuisi relyyra kia ijyymy: –Deuxu Iòlòna kia ijyy wese rare. Hābu rehumyhỹre alòbòròna-di suò. ²⁷ Hābu rummy rōrōmyhỹre txulemy rexixamyhỹre. Tii rieryōlemyhỹre timybo alòbòròna ratybienymyhỹre. ²⁸ Suu ixi dee sohojile raratymyra. Juhuu iòle ramyhỹre. Idi tahe raratynymyhỹre, ihewonau, tahe, iraty rasònymyhỹre. ²⁹ Bederaty rasònymyhỹreu, iyresydu riteònymyhỹre. Mayrabu-di riòròkemy bederatysò butudỹỹna dori rexihumyhỹre.

³⁰ Tii rarybera, Deuxu Iòlòna wexe aõwesere. Aõ-ò wexe rikioirenykre. Tiwexe ijyy kawesere.

³¹ Kia heka mostardaty wesere. Tii heka iyлатыhymy ratximyhỹre kabede-ki. ³² Tahe tii raumynymyhỹre wana, ireitòbòròdỹỹ ratyre rarurururunymyhỹre. Tahe nawii tamyle rasỹnymyhỹre. Iubòròrò rawolemy taheto riwinyre.

³³ Tahe Jesuisi Deuxu rybemy rierynanymyhỹre. Kia ijyy wese sōwemy ijyy rierynanymyhỹre. Kialemy iny-ò Jesuisi relyymyhỹre ibutumy tamy reny ritynynynyhỹreki. ³⁴ Kia-ò riòbitinyōlere ijyyō. Tahe iny-ribi irehemy taerydỹỹna-ò riòbitinyre.

³⁵ Iu txu txiorolemy Jesuisi rarybere taerydỹỹna-ò: –Rikiòhòrerenyke kowa weribi ijà-ò.

³⁶ Sōwemy iny rarire aho ijà-ki. Tahe taerydỹỹna tamy ralore. Roire hāwò-di. Tahe ijō hāwò idi ratximyhỹre. ³⁷ Tahe bede binahakỹ rexide-lenyre yhymy. Tahe òbò hāwò rihātenymyhỹre tai ritỹmynykemy ritelenyre. ³⁸ Tai tahe Jesuisi rōrōmy roimyhỹ tòro-ki irati tarahynatyre-ki. Tai tahe riixixanyre. Ijō rarybere: –Waerydỹỹdu, adeehe

awimy aõbo iny ituerenykre. ³⁹ Rexixamy Jesuisi. Tii yhy riixãwididỹnyre. Tii ahohokỹ-ò rarybere: –Biyryke! Tai bede ruhuwihikỹre. ⁴⁰ Tamyreny rarybere: –Aõherekibo kaiboho taberutenyteri? Deuxu aõbo tetyhynyõmahãtenyete? ⁴¹ Tai tahe tiiboho bede riòtiinyrenyra. Tahe widee raryberenyre: –Mowexe tuu yhy ahohokỹ-wana irybe riywinyke.

5

¹ Ritehemynyrenyre ijõ berohokỹ weribi ijãna-ò. Kowa heka ibutumy hãwãhãkỹ Kadarena inirenyre. ² Jesuisi hãworo-ribi resereu, hãbu tyytybybina-di robire ròhònyreri wabede-ribi. ³ Kia heka tiemy rasỹnomy raremyhỹ wabede-ki. Katahe wiji moheka womati reroti-di rataataaõtyhy. ⁴ Aõdorihe òhòõre tebò iwa rataataare womati reroti-di. Tiiemy heka rimoenymyhy. Teòruty ludu tawararu ludu tule ritòtnymyhyre iyresymy. Moheka iruruõre iny erydỹmy. ⁵ Txuu ruu-wana heka tii rasỹnyre wabedewo-ki. Tii rariamyhyre bederatòòmy. Tule rirajuamy tai rexihãtenyre mana-di. ⁶ Tai tahe Jesuisimy robireu, tii rajjaranyre Jesuisi-ò. Resere tatiowotimy Jesuisiko-ò. ⁷⁻⁸ Jesuisi tyytybybina-ò rarybere: –Iribi bòhònyke. Tahe tyytybybina rarybera: –Aõwe wadi tate. Kai, Jesuisi, ibutumy inyõ dee inyrate tate. Kai Deuxu Riòre tate. Lãhàmy lãhà, uritere aõbina binahakỹmy wahòròdỹõmykre. ⁹ Jesuisi ritỹraxyre: –Mobohe anire. Tyytybybina rirawyònyre: –Wanireny sòwetyhyre wasòwerenyreki. ¹⁰ Urile karibi wateòdỹrenyõmykre. ¹¹ Tahe kowa-ki

ix̄ni juramy riroximy r̄imyh̄y bederatò-ki.
¹² Ibutumy tyytybybina rexitòenyrenyre: —
 Biwateònybenyke ix̄ni jurawomy aralòrenykemy.
¹³ Tahe Jesuisi riteònyre. Tyytybybina aõwesele
 ròhònyre tahe ix̄niwomy ralore. Ix̄ni jura tahe
 raòrunyre rejuxunyre ijòtira-ribi. Berawo-txi
 tahe rabòròròre ahohok̄y-ki. Inatxi mil ix̄ni
 rabòròròre. ¹⁴ Ix̄ni-di itxeredu reare ijyymy
 ibutumy h̄awā h̄awāmy relyyrenyre. Tahe iny
 dirahude tamy itxeremy. ¹⁵ Tiiboho Jesuisi-ò
 doideu, tuu robirenyra h̄abu tyytybybina-di
 raremyh̄y. Tii rexitynymy ronymyh̄re. Tii
 heka òbitimy r̄hòtinymyh̄re. Tai iny mahādu
 rabedeòtiid̄ȳnyre. ¹⁶ Tiiboho tuu robirenyre,
 ijõ-ò relyyrenyre ix̄ni ijyymy, timybo aõhebo
 rot̄ȳnyremy h̄abu tyytybybina-di ratximyh̄re.
 Tule relyyrenyre timybo rot̄ȳnyre ix̄ni
 jura. ¹⁷ Iny rexitòenyre Jesuisi-ò rexitakremy
 isureny-ribi. ¹⁸ Jesuisi h̄aworo-ò ralore. Tahe
 h̄abu tyytybybina-di ratximyh̄re, rexitòenyre
 Jesuisi-wana rakemy. ¹⁹ Tahe Jesuisi idy derare.
 Tamy rarybera: —Mahe as̄y-ò, aijoi-ò belyyke
 aõna aõna Deuxu adee riwinyremy, iwese tii
 araruxetòenymyh̄re wese. ²⁰ Tahe h̄abu rare
 Debòwiò h̄awāreny-ò. Ibutumy Jesuisi aõna
 aõnamy ixidee riwinyremy relyyre. Ibutumy
 iny ribedeòtiid̄ȳnymyh̄re.

²¹ Ixityre Jesuisi rare ahohok̄y weribi ijà-ò. Ix-
 idee iny s̄owemy ributunyre. Tii heka ih̄ymyh̄y aho-
 hok̄y ijà-ki. ²² Tahe dehemynde tamy dohod̄ȳna
 heto weduõ. Ijairu inire. Tii Jesuisi robireu, resere
 tatiowotimy iko-txi. ²³ Ijairu rarybere Jesuisi-ò: —

Wariòre irubu iòhòtyhylemy roireri. Kai manakre tamy ebò bitidikremy. Tai awimy relekre, ru-ruòtyhy. ²⁴ Tahe Jesuisi tii-wana rare. Iny sòwemy tule rare iòhòkile tamy rỹire.

²⁵ Kia heka hāwyyō binamy ramyhỹre. Ihālubu rejuxunymy raremyhỹ. Beòra waòinatxi reuròmymy rejuxunymyhỹre, rihuòhyy raremyhỹ. ²⁶ Tii aòhòkỹmy rotỹỹnymyhỹre sòwemy òhotibedu mahādu-di. Tahe awimy rotỹỹòlemyhỹre. Urile tanieru ibutumy rahure òhotibedu mahādu-ki. Awimy releòlemy, ire bede-ò resere. ²⁷ Tahe roholare Jesuisi nina-ò tahe iòhò-ki nade inyy-ki. Idi ihewo-ribi rimyra itynora-ki. ²⁸ Hāwyy ixidee rarybemyhỹre: —Kriile itykynora-ki karimykiki, karekyteke. ²⁹ Tahe aòwesele ihālubu ijera ixāwire. Ixidee awimy ròhòtinyre. ³⁰ Jesuisi rieryre iruru iribi ròhònyremy, tai rarybere: —Mobo watynora rimyra. ³¹ Tahe ierydỹỹna raryberenyra aòherekibo tuu tarybeta ibutumy taheka iny abirelemy rỹireri. ³² Jesuisi rethemyhỹre urile mobo rarekemy. ³³ Hāwyy rierymyhỹ aòhebo rotỹỹnyre. Tii ruberumy Jesusiko-ò resere relyykemy iko. ³⁴ Jesuisi rarybera: —Lerỹ, atyhydỹỹna kỹnyhe aratara. Mahe, kai dori texiywinyta.

³⁵ Tii rarybemyhỹò, dohodỹỹna wedu deòdu rehemynyrenyri. Tiiboho raryberenyra: —Wawedu, Ijairu, ariòre rurumy roireri. Aòmybo tahe Erydỹỹdu-di atxiteri. ³⁶ Jesuisi kia-ò roholara tahe rarybera dohodỹỹna wedu-ò: —Brebuòmymy, urile bityhynkre. ³⁷ Jesuisi-wana roire, Pedro, ijō Txiau, ijō Joaō. Joaō heka Txiau seriòre rare.

Kaòle heka reòbyre tii-wana rakemy. ³⁸ Dohodỹña wedu heto-ò dehemynydeu, ixiyjadỹ-ò roholara, robureriò, rirajuarerìò. ³⁹ Jesuisi ralore tahe rarybera: –Aòherekibo tabutenyteri. Hiraririkỹ rurumy aòkò roireri. Tii urile ròròreri. ⁴⁰ Juhu urile tai rutxuenyrenyra Jesuisi-ki. Tahe Jesuisi ibutumy iny riòlòdỹnyra hetowo-ribi. Tahe ise, tybyle, ixidee rimyrenyra ratxirenykemy. Tahe tamy rirònyrenyre tai hiraririkỹ roimyhỹò. ⁴¹ Jesuisi hiraririkỹ debò rimyre tahe rarybera: –Talita kumi. (Katahe iwitxira rybemy rarybera. Kiamyneri heka, mynyikemy.) ⁴² Aòwesele hiraririkỹ rỹimy reara. Tahe rariara aòmyreki iwyrara waòinatxi reuròmy iwyramy. Tahe urile bede riòtiinyrenyre. ⁴³ Jesuisi riteranyre moò rierydỹkemy aòkò. Jesuisi tule rarybere: –Rỹsỹna tamy biwahinykre.

6

¹ Jesuisi dexitade kowa bede-ribi. Tahe tauladu tybiena hãwã-ò dehemynyde. Taerydỹña mahãdu riheludunyre. ² Sabado txumy rierynanyre dohodỹña heto-ki. Sòwemy iny roholamy rỹimyhỹ bede riòtiinymy. Tahe rarybere: –Tiribibo kia hãbu aòna aòna bede rieryre. Aòbedeeryhykỹbo ratximyhỹre. Timyta heka bedeòby riwinyre. ³ Kia aòbohe aòwidỹydule ratxireri, Marie riòrele. Tiiboho aòbohe Txiau, Jyje, Judasi, Simaò, seriòrebohòle ratxirenyreri. Terỹbohò aòbohe tule kakile ratxireri. Ibutumy iny heka Jesuisi derarenyre. Irybe rityhynyòre. ⁴ Jesuisi rarybere tamyreny: –Deuxu rybedỹdu heka tyhydỹña ritaòlekre tahãwãreny-ribi,

tajoi-ribi, tasỹ-ribi. ⁵ Tahe Jesuisi kowa-ki bededby riwinyõlere. Urile tebò ritidire inybina bina tyre, taile riteytenyre. ⁶ Jesuisi urile bede idireny riòtiinyre rityhynyõlemyhỹrenyreki. Tahe Jesuisi reurore hãwã hãwã-di erydỹmy.

⁷ Tii ixidee ributunyre tawaðinatxi erydỹna mahãdu. Tii ritednyre inatxi inatxi iubỹtỹnyre. Tamyreny taruru-ribi riwahinyre tyytybybina deòdỹki. ⁸ Jesuisi tuu rarybere: –Urile biwykre adebõna. Uritere orotxu aõkõ, nieruhyna aõkõ, nieru wereysanawo-ki aõkõ, iwydysyrenyõmykre. ⁹ Uritere waubehetyõmy noõmykre. Uritere inatximy wirawomy tyy-di ixityydỹõmykre. ¹⁰ Hãwã-txi malõkeki, tiiemy taile bonykre tiubedemybo iribihyyle bõhõnykre. ¹¹ Titxi behemynybenykeki, uritere iny erarenymy reakeki, roholaõkeki, txiðrare, urileta awareny bitõtynykre bede erynamy. ¹² Tahe tiiboho roire. Rybe ritỹnydỹmyhỹre iny ixidee rexirahĩrenykemy. ¹³ Tyytybybina irehemy iny-ribi ririradỹnykemy. Sõwemy inybina tyre òlyre ritxiwire. Tai tahe riteytenyre.

¹⁴ Kia heka iòlò Herodi roholara. Jesusini dori erynatyhymy raremyhỹ. Tahe ijõboho rarybemyhỹreny: –Joaõ Sebedỹdu rexixara rubu-ribi. Ijõ rarybemyhỹreny: –Eliale ratxireri. ¹⁵ Ijõ rarybera: –Deuxu rybedỹdu ratxireri. Deuxu rybedỹduõ wese heka ratxireri. ¹⁶ Herodi roholareu aõbo Jesuisi riwinyreu, rarybera: –Kia hãbu Joaõ ratxireri. Kia heka irati reorore heka rare. ¹⁷ Kia heka iòlò Herodi ritednyre imynamy. Idi tahe ritisanyre ròtenawo-ò.

Taseriòre hāwyy òraru-ki kia riwinyre. Filipi iseriòreni rare. Iseriòre hāwyyini Herodia rare. Herodi, Herodia-wana roire iseriòre riòrese-wana. ¹⁸ Juhuule Joaō rarybere Herodi-ò: —Kai aōkōre aseriòre hāwyy-di mabeōtyhy. ¹⁹ Herodia tamy iky reamyhỹ rirubunyky ratximyhỹ tahe aōkōhyylere. ²⁰ Herodi tahe Joaō rityhynyre. Tii rierymyhỹre Joaō hābu wihikỹō ratximyhỹ. Tai riyrubunyre ròtenawo-ki. Herodi Joaō roholareu, urile bede riòtiinyre urile roholawihikỹre. ²¹ Kia txuu ibeòra reare Herodi lisina berenamy riwinyre. Tahe ibutumy hāwā dinodu, soldado wedu mahādu, tule ibutumy hābu ninihikỹ Kalileia mahādu-ribi rihuòtere. ²² Ijadòma ralore resere, Herodia riòre. Herodi, iny huòtedu mahādu-wana tamyreny awire. Iòlò ijadòma-ò rarybera: —Aōtxile aōma wadee bexitòenyke, adee ariwahinykre. ²³ Inatyhymy adee ararybekre. Waaōna aōna iweeremy bexitòenykeki, adee ariwahinykre. ²⁴ Ijadòma tadi ritỹỹraxinyre aōmybo tahe tamy rexitòenykre. Ise rarybera: —Joaō Sebedỹkỹdu rati kai bexitòenykre. ²⁵ Tahe ijadòma ròsere iòlò-ò. Tahe ijadòma rarybera: —Joaō Sebedỹkỹdu rati kai biwahinykre hyna tyre-ki. ²⁶ Iòlò sōwemy rabedewore irybe-ki. Rexitxiōnyōlere iny dori sōwemy ibire-ki. ²⁷ Iòlò soldado rariare Joaō rati òrysymy. Tahe irati riorore ròtena-ki. ²⁸ Tahe irati diwyde besetyre-ki. Ijadòma-ò riwahinyre, tahe ijadòma tadi-ò riwahinyre. ²⁹ Joaō erydỹỹna rieryreu tahe, nade iumy òrysymy. Tahe iumy riwyre wabede-ò.

³⁰ Jesuisi erydỹỹna mahādu ròsereenyre Jesuisi-ò.

Tahe relyyrenyra ibutumy aõmydÿÿnana tule ibutumy rierynanymyhÿre. ³¹ Jesuisi tamy rarybere: —Inyboho sohojile rokoireny bederahy-txi ixielehydÿÿmy. Tii dori rarybera tamy heka byrena iòhòtyhyòlere tamy roxina raòhòòlere. Iny sòwemy tamy wii reutydynyri. ³² Tahe tiiboho sohojile hãwò-di roire bederahy-txi inyò-ò. ³³ Iny sòwemy tuu robira ròhònyrerimy. Tahe iny ibutumy hãwã hãwã ludu rajaranyre tòròsòna-ò. Tiibohole juhu rehemynyre iko-ki. ³⁴ Jesuisi rororeu, tahe inymy sòwemy robire, riraòreriò. Jesuisi tamy ratòenymy hÿre. Tiiboho dori iwese budoeni idi itxereduòmy rÿireri wesemy. ³⁵ Txuu raloreu, ierydÿÿna mahãdu Jesuisi-ò roire. Tiiboho rarybere: —Ka kÿnyhe bederahy roire txuuke rexihura. ³⁶ Kai tahe iny biteònykre hãwã hãwã mahãdu-ò rÿsÿna ixideereny òbradyÿmy. ³⁷ Jesuisi tamyreny rarybera: —Kaiboho tamy rÿsÿna biwahinykre. Tahe raryberenyre: —Timybo tahe inyboho 200 prata womati nieru-di orotxu rikiòbranyrenykre. Timy wexe tamyreny rÿsÿna rikiwahinyrenykre. Jesuisi tamyreny rarybera: ³⁸ —Tiwese orotxu bohe rÿire. Maa tamy itxeremy. Idi tahe rieryrenyreu, rarybera: —orotxu iruyre, utura inatxi. ³⁹ Idi tahe Jesuisi iny rabòròhòkÿ asityre rorukukremy. ⁴⁰ Idi tahe iny rabòròhòkÿ wii rirareare, ijò sÿwètamy, ijò 100my. ⁴¹ Jesuisi orotxu utura-wana rimyre tahe retehere biu-ò Deuxu-ò rexitòenyre. Idi tahe orotxu reòròròre. Riwahinyre taerydÿÿna mahãdu-ò riwykremy iny-ò. Tule utura inatxi wirarea riwahinyre iny mahãdu dee. ⁴² Ibutumy iny riroxire. Rihydymy rÿimyhÿ. ⁴³ Idi tahe

ritỹxinyre waòinatxi reurò weririmy orotxu yre yre utura-wana rauhenyredi. ⁴⁴ Kia heka rerỹsỹre 5000 inymy rỹsỹna-di.

⁴⁵ Juhu Jesuisi riteònyre taerydỹỹna mahãdu ixiko-ò kanaijõwe-ribi ijà-ò, Besaida hãwã-ò. Tii tahe ririre iny riteònykremy. ⁴⁶ Tahe riteònyreu, tii rare ixitòedỹỹmy bedè ratòhòkỹ-ò. ⁴⁷ Txioro bedesou hãwò ahotya-ki ratximyhỹre. Jesuisi suki ratximyhỹre ixisohojile. ⁴⁸ Tahe yhy rebònymhỹ iutedereny-ribi. Hãwò rariaõlemyhỹ. Tahe Jesuisi tuu robire txu ijera iòhò-di. Tahe betyredile tamyreny rariare. Jesuisi iratyreny wese rariakre. ⁴⁹ Tahe tuu robireu, betyre-di rariarerìò, tiiboho unisỹna rõhõtynyreny, rira-juareny. ⁵⁰ Tahe ibutumy tuu robira ibutumy ruberurennyre. Jesuisi aõwesele rarybere: —Urile beysabeny, breburennyõmy. Jiarỹle watxireri. ⁵¹ Tii ralore tamyreny hãworo-ò. Yhy urile ixãwire. Ierydỹỹnaboho bedè riòtiynyreny. ⁵² Tiiboho ruberurennyre, orotxu bedèòbyna dori rierykõrennyre.

⁵³ Tiiboho riòhòrennyre, ritehemynyre Kenesare-ò. Kia-ki hãwò ritisarennyra. ⁵⁴ Tahe hãworo-ribi ròtuòreriu, ibutumy iny Jesuisi rieryra. ⁵⁵ Juhu raòrunnyrennyre bina bina mahãdu òrysymy. Idi tahe didydenyde roholarennyre titxibo tai Jesuisi ratximyhỹò. ⁵⁶ Tii raloreu iny hãwã-ò aõbo ada hãwãhãkỹ-ò aõbo ada bedero-ò aõbo, tiemy iny bina bina mahãdu iryko-txi ritidire. Tai tamy rexitòenihikỹre tamy debò reakemy ityynora-ò. Ibutumy tamy debò reareu, tahe riteytennyre.

7

¹ Jesuisi-ò ributunnyre fariseu mahãdu lahi

rybe-di erydÿÿdu mahãdu wahe. Tule bede ywina erydÿÿ mahãduributunyre. Jerusalẽ-ribi ritehemynyneri. ²⁻⁵ Jesuisi erydÿÿna mahãdu tebò risuhòomy riroxireri. Fariseu mahãdu, Bede ywina erydÿÿ mahãdu-wana Jesuisi-ò ritÿÿraxinyrenyre: –Aõherekibo aerydÿÿna tebò risuhòomy riroximyhÿrenyre. Aõherekibo ihetxiu bede ywidÿÿnana rityhynyõreri. Lahi rybe-di erydÿÿdu mahãdu judeu mahãdu-wana ihetxiu iwidÿÿnana riwinymyhÿrenyre. Tii heka tebò tiu suròduõmy riroxiõmyhÿre. Tiiboho aõna aõna wydyna heto-ribi dòðsemahãdeu, tiu heka rõhõðdile riroxiõmyhÿre. Sõwemy iwidÿÿnareny rityhynymyhÿre. Bemona butxi, womati bese-wana risuhòrenyre. ⁶ Jesuisi tamy dirawyònyde: –Isaia juhuule rarybere tiwesebo kaiboho toite. Kaiboho itxenadÿÿdu toite. Riritinyu rÿire:

–Kaiboho riwawowydynymyhÿre tary-di. Tahe awo-ribi waluuõlemyhÿre.

⁷ Kaiboho riwawowydynyre tahe watxi nohõti ijeraõlerenymy. Kai teerynanyteri erydÿÿna-di iny nohõti-ribi namyhÿdeõle.

⁸ Kai Deuxu erydÿÿna tyhydÿÿõmy. Iny erydÿÿnale tetyhynytenyte. ⁹ Tii tamyreny rarybera: –Kaiboho aõbo ijõ bihõrõnybenyleke, biaõmysÿnybenyke. Deuxu rybe bede ywina kaiboho tetyhynyõlemyhÿtenyte. Arybe bede ywinale tetyhynyõlemyhÿtenyte. ¹⁰ Moisesi rarybera:

–Kaiboho biytyhynybenyke adirybe-ò, tybyrybe-ò. Inyõ tadimy tybymy iehehemy

rarybekeki, aõtaxiny ruruke.

11 Kaiboho teerynanyteri hãbuõ-ò tadi tybywana-ò rarybekemy: –Wanieru waribi bitaõke. Ariwahiny dori Deuxu-ò. Wanieru heka korbÿ rare. (Korbÿ heka uri wahidÿÿna rare, iwitxira rybe wahe.) 12 Jesuisi rarybehyymy rare: –Kiawese rierynanymy raremyhÿ, kaiboho uritere hãbuõ tadiboho-ò aõmydÿÿõmy rarekemy. 13 Kawese ityhydÿÿrenyõmy Deuxu rybe, aerydÿÿna òraru-ki. Sõwemy aõna aõna kawese tatÿÿnytenyete. 14 Tahe Jesuisi ixityre rarybera inysõwe-ò: –Bodoholabenyke, ibutumy bierybenykemy. 15 Aõbo iny-ò ralòmyhÿre, kia tahe iny risunyõlemyhÿre, inywo-ribi tahe namyhÿde kia tahe iny risunymyhÿre. 16 Inyõ bierybenykeki, boholawibenyke. 17 Tahe iny-ribi ròhònyreu, heto-ò raloreu, ierydÿÿna mahãdu tahe tamy rÿÿraxire iyyymy. 18 Tii tamyreny rarybere: –Kaiboho tule aõbo teeryõmahãtenyete. Aõbo iny-ò ralòmyhÿre, kia iny risÿnyõlemyhÿre. 19 Tawotyhy-ò dori ralòõlemyhÿre. Urile weryri-ò ralòmyhÿre idi umy-ribi ròhònymyhÿre. (Ibutumy rÿsÿna tahe awire riki.) 20 Tule rarybere: – Aõbo iny-ribi namyhÿde, kia risurisenymyhÿre. 21 Inywo-ribi tahe ròhònymyhÿre ibutumy nohòtinana binahakÿ. Kia heka rare nohòtinana binahakÿ: òta òtalemy, wasilemy, rubudÿÿlemy, ijõ hãbu riòrese ridymy, 22 ibutumy aõna aõna wedu iny ratyrekemy, binamy rõhòtinymyhÿre, ruilemy, aõbina binaõle, itxeredu, aõbina binalemy rybedu, tule itxÿtelemy. 23 Kia heka ibutumy bina bina inywo-ribi namyhÿde. Kia heka iny

rexisunymyhÿre.

²⁴ Jesuisi rexitare. Tahe r re Tiro hãwãreny-ò, Sidõ beà hãwã hãwã-ò. Tahe tii ralore hetowo-txi tahe moõ rierykõdi ixidire hetowo-txi. Ralòrau tahe, rexiwòke aõkõ. ²⁵ Jesuisi tyhynina-ò hãwyy roholare, tahe tamy nade, tatiowotimy resere. Iriòre-riki tyytybybina dire. ²⁶ Kia heka hãwyy Grego mahãdu rare. Ilahinanire heka Siru Senisia. Tii Jesuisi-ò rÿÿraxire tyytybybina iriòre-ribi deòdÿÿmy. ²⁷ Tahe Jesuisi tamy rarybere: –Txioiny, juhu inihe uladu mahãdu riroxikre. Wadee awiòre uladu-ribi rÿsÿna ritake ijòròsa-ò. ²⁸ Hãwyy rirawyònyra: –Inatyhy rare, Wãhĩ. Kurile rÿsÿna kyre kyre rejujumahãre. Kòwòruku bese-ribi, kuladu-ribi. Kiamy heka itxoòròsa rirakuximyhÿre. ²⁹ Tahe Jesuisi tamy rarybera: –Kia rybe òraru-ki heka kaa tarybeta tyytybybina ariòre-ribi rohonyra. Kia bòòsekre aheto-ò. ³⁰ Hãwyy taheto-ki rehemynyreu, iriòre-ki rahara byretyre-ki roire. Hãwyy rieryre tyytybybina iribi ròhònyre.

³¹ Tai tahe Jesuisi ixityre rexitare Tiro hãwãreny-ribi, Sidõ beà hãwã reny-ò rara Kalileia aho-ò. Tii raremyhÿu, Debòwiò hãwã hãwã reny ririre. ³² Tahe tamy didydenyde hãbuõ nohõtityõ. Tii roholaõlemyhÿre. Tule awimy rarybeõhyylemyhÿre. Tahe rexitòenyrenyra Jesuisi-ò, tebò ityre ritidikemy. ³³ Jesuisi tii ritare insòwehekÿ-ribi tahe tebò ritidire tõhõti-ò. Tahe rarybexinyre tahe idi tòròtòbymy reare. ³⁴ Tahe Jesuisi tarue ruwyre biu-txi, ele-di reare. Tahe rarybere: –Ebata. (Kia heka rybe riwiuròsòdÿÿmy rare, –Biraynyke.) ³⁵ Aõwesele

tõhõti riraynyre. Tòròtò riykoykonyre. Tii aõwesele awimy rarybere. ³⁶ Jesuisi rarybere: —Uritere iny-ò ijyyõmykremy. Ihãrele tahe ibutumy kiamy iny-ò relyymyhÿre. ³⁷ Idi bede riõtiinyrenyire. Tahe raryberenyre: —Ibutumy tii riteytenymyhÿre. Tii nohõtity aõwesele roholamyhÿre. Hãbu rybeõ aõwesele rirybedÿÿnymyhÿre.

8

¹ Kia txuu ixityre iny sõwemy ributunyre. Kiau tule aõrÿsÿnamy ijõõhyllere. Jesuisi taerydÿÿna mahãdu ixidee ributunyre. Tahe tamyreny rarybere: ² —Jiarÿ inysõwe rewotðenyleri. Tiiboho txuu inataõ waki rÿireri byreõlemy. ³ Jiarÿ byreõlemy ariteðnyrenykeki, ryrowetyakile reserenykre iòderawyrinymy. Tule, iny sõwemy irehe-ribi nade. ⁴ Ierydÿÿna tamy dirawyònyde: —Timytaka inyboho tamyreny orotxu rikiwahinyrenykre kabederahy-ki. ⁵ Tii ritÿÿraxinyre: —Tiwesebo orotxu kai ijõdire. Tiiboho rarybere: —Debò inatxi reuròmÿ. ⁶ Jesuisi iny sõwemy risÿdÿÿnykremy sutyre-ò. Tii orotxu debòinatxi reuròmÿ rimyra. Tii rexitðenyreu tahe riorore. Tahe riwahinyre taerydÿÿna mahãdu-ò riwykemy iny sõwe-ò. ⁷ Tule utura ibutemy rÿimyhÿ. Tahe rexitðenymy rahudi tahe taerydÿÿna-ò rarybere: —Kaa tule biwybenyke iny sõwe-ò. ⁸ Tiiboho riroxirenyremy tahe rihydymy ratximyhÿ. Iyre yre rauhenyre riwyrenyre weriri debò inatxi reuròmÿ riwyrenyre rÿÿximy. ⁹ Inaubiòwa mil iny iòhòmÿ rÿimyhÿ. Tahe Jesuisi rexideðwarinyre iny sõwe-ò. ¹⁰ Tii ralore hãworo-ò

taerydÿÿna-wana. Tiiboho roire Damanuta hãwãreny-ò.

¹¹ Lahi rybe-di erydÿÿdu mahãdu nade fariseu mahãdu wahe. Tiiboho tamy nade rybe òbitidÿÿmy. Tiiboho rÿÿraxirenyra bede erydÿÿnaõ kiditeòsinykremy. Lahi rybe mahãdu rierykemy tii inatyhy rare urenana. ¹² Tii raelewesenanyre tawo-ki rarybere: —Aõherekibo kaa iny mahãdu rÿÿraximyhÿre bede erydÿÿnamy. Inatyhymy jiarÿ ararybekre: —Bede erydÿÿna heka tamy rawahidÿÿõtíhy. ¹³ Tahe idi Jesuisi rexitare. Hãworo-ò ralore. Idi rohorere kanawe-ribi ijã-ò.

¹⁴ Ierydÿÿnaboho tahe tõhõti rosare orotxu wydysy-ribi. Sohojityhyle heka orotxu roimyhÿ hãworo-ki. ¹⁵ Jesuisi tamy ribedeerynyre: —Beteheiny, biyrubuny, lahi rybe mahãdu, Herodi mahãdu-wana wirÿsÿna uri-ribi. ¹⁶ Jesuisi erydÿÿna mahãdu ixideele rarybere: —Aõherekibo Jesuisi kia rarybereri. Inyboho iorotxurenyõreriki òsana. ¹⁷ Jesuisi heka rieryra tahe rarybera: —Aõherekibo raryberemy orotxu ijõõremy. Kaiboho aõbo teerytenyõte. Kaiboho aõbo arawoxierinyrenyõre.

¹⁸ Kaiboho aõbo arueõrenyre. Tabiõletenyteri. Kaiboho aõbo itxi õhõtireny reaõlereri.

¹⁹ Jiarÿ 5000my iny-ò orotxu reareareu, tiwesebo weririmy orotxu yre yre-di ritÿxinyre. Tahe tiiboho rirawyònyre: —Waõinatxi reurò weririmy.

²⁰ Tahe debòinatxi reurò orotxumy reòròra 4000 inymy, tiwesebo weriri orotxu yre yre-di ritÿxinyre. Tiiboho rirawyònyre: —Debòinatxi

reuròmy. ²¹ Tahe tamyreny rarybere: — Timyrekibo tahe teerytenyõte.

²² Dehemynyde Besaida hãwã-ò. Tahe hãbu ruetà-di tamy didydenyde. Rexitòenyrenyde tamy debò reakemy. ²³ Jesuisi tebòmy rimyre tahe ridyre hãwã-ribi bederahy-ò. Iruetyre rarybexinyre. Tebòmy tamy reare. Tahe ritỹ̃raxinyre: —Aõmybo aõbo tabiteri. ²⁴ Hãbu tahe biu-txi tarue riukora, tahe rarybera: —Hãbumy rabira, òwòru wese rỹ̃ireriò, rariareri. ²⁵ Ixityrele Jesuisi tebò reare irue-ò. Hãbu heka irue reyteramy òbitilemy retehereri. Robire irehetyhy-ò itỹ̃nyhỹkỹlemy. ²⁶ Tahe Jesuisi riteònyre isỹ-ò urile ihãwã-ribi ròðseõmykre.

²⁷ Jesuisi taerydỹ̃na mahãdu-wana ròhònyrenyde Sesaria Filipi hãwãreny-ò. Ryki taerydỹ̃nareny-ò ritỹ̃raxinyre: —Mowe hãbureny wamy raryberenyra jiarỹ raremy. ²⁸ Tiiboho rirawyònyra: —Joaõ Sebedỹ̃du riki, ijõ Eliasi riki, ijõ riki Deuxu rybedỹ̃duõ. ²⁹ Tahe Jesuisi tamyreny ritỹ̃raxinyra: —Kaiboho, mobo tarybetenye jiarỹ raremy. Tahe Pedro rirawyònyre: —Kai Kristu atximahãte. ³⁰ Tii raraybinihikỹmy ixi-ki rarybera: —Inyko wamy ijyyõmykre.

³¹ Jesuisi rexiranyre erydỹ̃my: —Deuxu Riòre Hãbutyhyhykỹ heka aõna aõnamy aõhõkỹmy rotỹ̃nynihikỹkre. Matuari mahãdu heka ixideramy ryanakre. Tule Deuxu aõmysỹdỹ̃du wedu, Bede ywina erydỹ̃ mahãdu ixideramy ryanakre. Jesuisi kudurukre idi tahe txu inataõ rỹ̃idi kedexixakre rubu-ribi. ³² Idi

tahe idùrurehekỹlemy tamy rarybere. Pedro iny-ribi Jesuisi ritare, tahe tamy rarybere: —Kawese rybeõmyreke. ³³ Jesuisi ròõsemy reare, retehemyhỹ taerydỹỹna-ò tahe Pedro-ò rarybere: —Bexitake wako-ribi Satanasi. Kai dori Deuxu ijoi aõkõ atximahãte. Kai hãbu ijoi tate. ³⁴ Jesuisi ributunyre iny sõwehekỹ, taerydỹỹna-wana tahe rarybere: —Inyõ wahemy kanakeki, ixideele rexirahĩke, tahe taitxeò rimyke riwaheludunykemy. ³⁵ Mobo taumy tarasamy rurukeki, riononykre. Tahe aõtxile iny waluukeki, Rybewihikỹ luukeki, taumy wadee riononykeki, kia heka taumy ritakre. ³⁶ Aõbo tahe awire, ibutumy aõna aõna bitake tai aumy biononyke. ³⁷ Aõbo tahe iny riwahinykre taumy wydyna òkesena aõbo. ³⁸ Kai wijinabòdu òrarudu mahãdu rare, òta òtadu rare. Aõtxile iny walau warybe lau raixỹrukeki, tule Deuxu Riõre Hãbutyhyhykỹ ilau kanaixỹrukre tii nadeu ýjuwihikỹ-di boo wowydyna-ò.

9

¹ Tii tamyreny rarybere: —Inatyhymy adeereny ararybekre. Ijõõ kaki ratximyhỹre ruruõtyhy Deuxu Iòlònu taruru-di kedehemynykreu.

² Tahe debò sohoji txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire. Jesuisi tamyreny rexiwitxiranyre. ³ Ityy heka urile rabòtòranyre. Iurahakỹmy relere surõna ratyre heka rauranymy ritoosònyre. ⁴ Tahe tamyreny dexitỹnynyde Eliasi, Moisesi-wana tahe rarybemyhỹre Jesuisi-wana. ⁵ Pedro rarybere Jesuisi-ò: —Wawedu, awityhymy

inihe kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. ⁶ Pedro rieryõlemyhÿre aõmybo rarybekemy ruberumyhyremy. ⁷ Nonoe dobehede iubòròna bedede ritòbònyre. Tahe rarybere reare rybeuni iy-ribi: –Kia heka wariòre waluu rare. Kaiboho tamy boholabenyke. ⁸ Tiiboho reteherenyre tahe inyò robiòlerenyre. Jesusilemy robirenyre.

⁹ Dohedeu tahe inydee Jesuisi rarybere: – Uritere inyò-ò tuu ijyyõmykre aõmybo tobitemy. Uritere Deuxu Riòre Hãbutyhyhykÿ rubu-ribi rexixareu, tai tahe tuu belyybenykre. ¹⁰ Kia rybe wasimy riworenyre. Ixideerenyle wii ritÿÿraxinyrenyre: –Aõmybo rarybereri, rubu-ribi rexixamy nade. ¹¹ Tiiboho tamy rÿÿaxirenyre: – Aõherekibo bedede ywina erydÿÿ mahãdu rarybere Eliasi juhu kanakremy. ¹² Tii rirawyònyre: – Inatyhymy, Eliasi juhu nade. Ibutumy aõna aõna riywinykremy. Tewesebo raritinanymy rÿireri: – Deuxu Riòre Hãbutyhyhykÿ aõna aõnamy aõhòkÿmy rotÿÿnynihikÿre. Tahe tii inydee awiòhykre. ¹³ Adeereny ararybekre: –Eliasi nade. Tule iny ixideewilemy tamy riwinyrenyre. Kaheka iaõmydÿÿnana riritinanymy rÿire.

¹⁴⁻¹⁵ Jesuisi dehemynydeu taerydÿÿna mahãdu-ò, tahe robire iny sòwehekÿmy tahe bedede ywina erydÿÿ mahãdu taerydÿÿna-wana ritxiõnymyhyre. Tahe Jesusimy robireu, tahe tiiboho riumysaõnyrenyre. Raòrunyrenyre irybedÿÿmy. ¹⁶ Tamy rÿÿraxire: –Aõmybo tamyreny tatÿÿraxinyteri. ¹⁷ Inyò rirawyònyre: – Erydÿÿdu, wariòre adee redyreri. Tii tyytybybina

rybeõhõkỹ-di ratxireri. ¹⁸ Tyytybybina rimyreu tahe riatorye bede-ò. Idi tahe urile txuu riyiyinyre. Tahe tii rubureriwesele roire. Aerydỹỹna-ò jiarỹ rarybera tyytybybina riteranykremy, tahe tiiboho iruruõhyymyhỹ. ¹⁹ Jesuisi tamyreny rarybere: — Tiwesebededỹỹnanabo wjinabòdu ityhyõlemy rỹira. Tiwesebededỹỹnanabo awanareny ariijekemy. Wadee uladu bididyke. ²⁰ Tahe didydenyde Jesuisi-ò. Jesuisimy robireu tahe tyytybybina urile raitxỹteitxỹtenemy resere. Idi tahe urile bede-ki rara òhòremy raratymyhỹ rybexi irywomy ròhònymyhỹ. ²¹ Jesuisi rỹỹraxire uladutyby-ò tiubedemybo taheka kaa binana tamy dehemynyde. Tii rarybere: — Uladuylaule idi ròrarunyre. ²² Tiwese wese aõkõ idi rehure bera-ò, heòty-ò rahukemy. Aõ biwinykeki, jiarỹboho biwawiòhenanyke wijile. Kai biwaruxetòenybenyke. ²³ Jesuisi rarybere: —Kai bityhynykeki, ibutumy aõna aõna rỹimyhỹre. ²⁴ Aõwesele uladutyby ryryre idi tahe rarybere: —Jiarỹ retyhynyre, biwiòhenanykre aõbo rauhenyre. ²⁵ Jesuisi iny sõwemy robire wii rotyrerimy, tahe riteranyre tyytybybina-ò: — Kai tyytyby rybeõ tule roholaõ iribi bòhònykre, tiu ixityre malòõtyhy. ²⁶ Tyytybybina ryryre. Uladu ritxỹtenyre idi tahe ròhònyre. Uladu rubuwesele roire herimy. Tahe iny sõwemy rarybere: —Tii rurura. ²⁷ Jesuisi rimyre tebò ritamadỹỹnyremy tahe uladu rỹire lamamy. ²⁸ Heto ralorenyreu ierydỹỹna mahãdu tamy rỹỹraxirenyre: —Aõherekibo jiarỹboho tyytybybina riteònyõrenyra. ²⁹ Tamyreny rarybere: —Kaiboho

bexitòenybenykeki byreõna-di bonybenykeki, kiawesele heka ròhònyke.

³⁰ Iribi ròhònyreu, Kalileia lowysy-di roirenyre. Jesuisi heka inyerydỹỹderamyhỹ tai ratximyhỹki.

³¹ Taerydỹỹna mahãdu Jesuisi rierynanymyhỹre. Jesuisi tamyreny rarybere: —Deuxu Riõre Hãbutyhyhykỹ heka rawahidỹỹkre hãburenyõ-ò. Tii hãbureny rirubunykre. Idi tahe txu inataõ txuu rỹidi tahe kedexixakre rubu-ribi. ³² Tiiboho rierykõlere tahe ruberurenyre tỹỹraxidỹỹki.

³³ Idi tahe rehemynyre Kafanaõ-ò. Ralore heto-ò. Jesuisi tamyreny rỹỹraxire: —Aõmywe widee tarybetenyteri ryro-ki. ³⁴ Tiiboho urile roholarenyre rybeõlemy. Ryro-ki dori rarybemyhỹ mowexe wiribi aõnimy ròhònykre. ³⁵ Tahe Jesuisi ronyrenyredi, Jesuisi taerydỹỹna mahãdu ributunyre erydỹỹmy: —

Inyõ juhuludumy rarekemy ratxikeki, tai heka tii ihewoludukre. Tule tii reakre ibutumy deòdumy. ³⁶ Tahe Jesuisi uladuõ rimyre risỹnyre iubetya-txi tahe taerydỹỹna-ò rarybere: ³⁷ —Moõ uladu kawese wadee riwiòhenanykeki, riwawiòhenanyre. Moõ riwawiòhenanykeki, tule wateòdỹỹdule riwiòhenanyre.

³⁸ Joaõ tamy rarybere: —Erydỹỹdu, jiarỹboho tuu rabirenyra inyõ tyytybybina-di ani-ò rehureriò. Tahe iny mahãdureny aõkõ rare. Tahe jiarỹboho tamy reijõnyrenyre iny mahãdureny dori aõkõ rare. ³⁹ Tahe Jesuisi rarybere: —Bijõnybenyõkre. Inyõ wani-di bedeòby riwinykeki, wanimy heka ibinamy rarybeõtyhy. ⁴⁰ Iny òluduõkeki, tii heka iny ijoi rare. ⁴¹ Inyõ beõ adeereny waninamy

riwahinykre-wana, kai waerydỹỹna dori tate, inatyhymy adee ararybekre. Tii tawahidỹỹna ritakre. ⁴² Inyõ kaa uladu ityhydỹỹdu riatykre òraruna-txi, kia heka tamy awire tòti-ki myna ritaamy idi bera-txi rehure. ⁴³ Ebòle araatykeki òraruna-txi, juhuule adee awire ebò biòròke. Kia heka awityhykre iny welytyle ralokre biu-ò, tahe awiõtyhykre heòtytòteehekỹ-ò ralòkeki debò inatxi-di. ⁴⁴ [Tai mohõ ruruõtyhy. Heòty ruruõtyhy.] ⁴⁵ Awa araatykeki òraruna-txi, juhuule adee awire awa biòròke kia awire iny rariake awa sohojilemy, awiõre heka heòtytòteehekỹ-ò ralokre awa inatxi-di. ⁴⁶ [Tai mohõ ruruõtyhy. Heòty ruruõtyhy.] ⁴⁷ Arue araatykeki òraruna-txi, bitake idi behuke juhuule adee awire arue sohoji-di Deuxu Iòlò biu-ò ralokre, tahe awiõre heòtytòteehekỹ-ò ralokre arue inatxi-di. ⁴⁸ Tai mohõ ruruõtyhy. Heòty ruruõtyhy. ⁴⁹ Ibutumy iny heka heòty-di rijyyranykre. ⁵⁰ Jyyra heka awire, saa wahe. Urile taruru riononykeki, tiwesebo tarỹsỹna uri ixybyle tawo-ki bitidikre. Kaiboho ibutumy widee eysarenylere.

10

¹ Jesuisi iribi rexitare. Tahe rare Judeia bedede bede-ò, tule Jordaõ kanawe-ribi ijà-ò. Iny sòwemy tamy ributunyre, tahe tiiboho Jesuisi rierynanyre. Tii reòarimy tuu ratximyhỹre.

² Tamy lahi rybe-di erydỹỹdu mahãdu dehemyndenyde irutaadỹỹrenymy. Tahe tamy rỹỹraxinyre: –Hãbu aõbo tahãwyy ririleke, awire aõbo ibinare aõbo. ³ Tahe Jesuisi tamyreny rirawyònyre: –Aõrybe bedede ywina-di

Moisesi rierynanyre. ⁴ Tahe tiiboho Jesuisi-ò dirawyònydenyde: –Tii rierynanyre iny tahāwyy ririkemy. Urile juhuu hāwyy bede erydỹỹna rybe tyyriti riwinykemy, idi tahe tahāwyy ririkemy.

⁵ Jesuisi tamyreny rarybere: –Ōhõtixyre dori Moisesi kia rybe bede ywina adee riwahinyre.

⁶ Juhu bedeu Deuxu

riwinyre hābu, hāwyy-wana.

⁷ Iurenana tahe hābu tadibohosỹ-ribi ròhònymyhỹre tai roimyhỹre hāwyy-wana.

⁸ Hābu inatyhy hāwyy-wana roimyhỹreu, sohoji tyhylemy radenymyhỹre.

Iny inatxi inymy aōkō rỹimyhỹre, sohoji tyhylemy rỹimyhỹre. ⁹ Hābu hāwyy-wana

Deuxu ributunyreu, iny iwitxira wiribi ritòhòrarienyōtyhy. ¹⁰ Hetowo-ki tahe ierydỹỹna ritỹỹraxinyre kia rybe-ki. ¹¹ Jesuisi tamyreny

rarybere: –Aōtxile hābuō tahāwyy ririkeki tahe ijō-wana roiikeki, kia heka òtadu rare. ¹² Hāwyy tahābu ririkeki tahe ijō hābu-wana roiikeki, kia heka wedena rare.

¹³ Tiiboho tamy didydenyde uladu tamy debò reakemy. Tahe ierydỹỹna riononymy rarybere tamy idyrenyōmykre. ¹⁴ Jesuisi kiamy robireu, rik-yaranyre rarybere: –Txiò, kididyke uladu wadee.

Uladu wese dori Deuxu Iòlòna rare. ¹⁵ Inatyhymy ararybekre: –Moō heka uladuwesemy Deuxu Iòlòna ralòōkeki, kia heka Deuxu Iòlòna-ò ralòōtyhy.

¹⁶ Tahe Jesuisi rexiranyre uladu manamy taaxiò-ò rimyre. Tahe tebò iratyytyre ritidimy tamyreny rarybewihikỹre.

17 Tahe Jesuisi rydi raloreu, hãbuõ tamy reare. Tahe hãbu iko-txi resere tatiowotimy. Rarybere: —Erydỹỹdu wihikỹ, aõwexe ariwinykre biu-ò hena aritakremy tiiehyymy umywihikỹ-di ararekremy. 18 Jesuisi tamy rarybere: — Aõherekibo wihikỹmy wadee tarybeta. Hãbu awiõre. Deuxu sohojile tahe awire. 19 Bede ywina kai teeryte: rubudỹỹõmykemy, tule òta òtaõmykemy, wasiõmykemy, tule ruiõmykemy, iny wii itxenadỹỹõmykemy, adi bityhynykemy, boo tule. 20 Hãbu tamy rarybere: —Erydỹỹdu, kia bede ywina rewinyhyylere, uladuule wiji-ò. 21 Jesuisi tamy retehere tuu reòarire tahe rarybere: — Kai sohoji aõmydỹỹnale aki nasiranyde. Kai makre, ibutumy aõna aõna-di bòhònykre, idi tahe idi biwahinykre iny aõkõ mahãdu-ò. Kia tahe aõmydỹỹnadikre biu-txi. Tahe manakre biwaheludunykre. 22 Kia rybe-ki heka hãbu rabadewore. Rexitare ibedewomy urile iaõna aõna sõwetyhyreki.

23 Jesuisi retehemy iwerura-di tahe rarybera taerydỹỹna-ò: —Kia iny iaõna aõna sõwemy rỹireri, tamy Deuxu Iòlòna-ò ralòke isirare. 24 Ierydỹỹna mahãdu bede ribedeòtiinyrenyre irybe-ki. Jesuisi ixityre rarybere: —Waexiboho, isiratyhy rare Deuxu Iòlòna-ò ralòkemy. 25 Kamelo tyyrorenawo-di ralòkemy isirakeki, kia-rihi isiratyhyre iny iaõna aõnadikeki ralòke Deuxu Iòlòna-ò. 26 Tiiboho bede ratiinyre sõwemy. Widee rarybere: —Mobo tahe iòraru-rihi iny ritakre. 27 Jesuisi iwerora-di retehere tahe rarybera: — Inatyhymy kõaõboka hãbu-ò isiratyhyre. Deuxu-ò

tahe ibutumy aõna aõna isiraõre. ²⁸ Pedro rexiranyre rarybere: –Boholake, jiarỹboho ibutumy rerirenyra araheludunykremy. ²⁹ Jesuisi rarybere tamy: –Inatyhymy adeereny ararybekre. Moõ waluukeki, rybewihikỹ luukeki, kia heka ririkre: heto, taseriõre, tyby tadi-wana, tariõre, tabede, ibutumy ririkre. ³⁰ Wijile itarasamy rarekre: 100 sỹmy, 100 seriõre, 100 tybyboho, 100 tadibocho, 100 tariõreboho, 100 tabede. Iny tamy rarybebinanykre tule. Ijõ bedede kanakre tahe taumy tỹmyra-di tiemy rarekre. ³¹ Tahe sõwere juhu ludu ihewomy ròhònykre. Ihewo ludu ijõ iko-ò ròhònykre.

³² Tiiboho rydi raòwònyrenyrene Jerusalẽ hãwã-ò. Jesuisi heka rare ikorenymy. Ierydỹna mahãdu bedede ribedeòtiinyre. Tiiboho Jesuisi riheludunymy ihewo-ribi. Tahe Jesuisi reraòmyhỹ idi rare waòinatxi reurò taerydỹna mahãdu-wana. Tii relyyre ixityre aõbo ixidee kỹnyikremy. ³³ Boholabenyke inyboho roirenyreri Jerusalẽ-ò. Kowa, jiarỹ Deuxu Riõre Hãbutyhyhykỹ, inyõ riwawahinykre Deuxu aõmysdỹdu mahãdu wedu-ò, bedede ywina erydỹ mahãdu-ò. Kia warubudỹmy riwawahinykre tori-ò. ³⁴ Tiiboho kidiwalahikre. Watyre kanarybexinykre. Òhòte-di kidiwahãtenykre. Idi tahe kidiwarubunykre inataõ txu-di. Tahe rubu-ribi adexixakre.

³⁵ Joaõ, ijõ Txiau, wii Zebedeu riõre, tamy nade. Tahe rarybere: –Erydỹdu, kai aõma aõ wadeereny biwahinykre. ³⁶ Jesuisi rarybere: –Aõbohe jiarỹ adeereny ariwahinykre.

37 Tahe tamy rarybere: –Kai, aiòlònasỹ-ò kedehemynykreu, aruruwe-ribi aronykre, waseriòre ahywewe-ribi ronykre. 38 Tahe Jesuisi rarybere: –Kaiboho teeryòlemahâte aòmybo textitònyteri. Kaiboho aòbohe wabemona-di biòbenyke idi Jerusalẽ-ò adiòkremy wahãredi. Kaiboho aòbohe wasebena-di mohòlebenyke idi jiarỹ anohòkremy wãhãredi. 39 Tiiboho dirawyònyde: –Kohe tulekre. Jesuisi tamyreny rarybere: –Bemona-di ariòkre kaiboho tule idi biòbenyke. Sebena-di jiarỹ adohòkremy, kaiboho tule idi mohòbenyke. 40 Tahe mobo wabire ronykre ruruwe-ribi hywewe-ribi kia heka jiarỹle ariwahinyòkre. Kia tahe iyrubudỹmy rỹireri Deuxule kidiwahinykremy. 41 Tai debòwiò erydỹna mahãdu heka Joaõ-ò, Txiau-ò tamyreny iky reare. 42 Jesuisi tamyreny ryryre tamy kanakemy, tahe rarybere: –Kaiboho teerytenynte toriweðu irurusòwe dire. Iny nihikỹ heka iny my deòdu luure. 43 Jesuisi kiamy rarybere: –Kia wese tahe aworeny-ki aòkòkre. Kaiboho aòtxile mobo bòityhynyhyykre, ijõ iny deòdumy rarekre. 44 Mobo juhutyhy rarelekre, deòdumy rarekre. 45 Deuxu Riòre Hãbutyhyhykỹ nade teòdu sòwekemy aòkò tahe ixilemy reòdunykemy. Nade taumy wahidỹmy sòwemy iny tarasamy.

46 Idi tahe roire Ijeriò hãwã-ò. Jesuisi taerydỹna-wana iny sòwehekỹ-wana ròhònyrenyra. Tahe rahare Bartimeu ruetahàkỹ-ki. Bartimeu tahe Timeu riòre rare. Tii ronyre rywe-ribi aõna aõnamy rexitònyreri. 47 Tii roholare Jesuisi Nazare ludu kia rare tahe tamy

ryryra: —Jesuisi, Davi riòre, wadee maruxetòekre. ⁴⁸ Sõwemy tamy rarybere: —Rybeõmyke. Tahe aõhe-wana tii rarybemyhÿre: —Davi riòre wadi mawotòeke. ⁴⁹ Jesuisi riyryre tahe rarybere: —Tamy byryke wadee kodoikemy. ⁵⁰ Tahe rexitareu rÿire, wylemy nade Jesuisi-ò. ⁵¹ Jesuisi tamy rarybere: —Aõmybo kai taruteri adee ariwahinykremy. Tahe hãbu ruetàhàkÿ tamy rarybere: —Wawedu, ixityre arobikremy. ⁵² Jesuisi tamy rarybere: —Makre, atyhydÿÿna kai arateytenyra. Kialehe rare. Aõwesele ixityre tii robire. Tahe Jesuisihemy rare, ryki.

11

¹ Jerusalë iòhòmy ritehemynyrenyreu, tahe inatxi taerydÿÿna riteònyra hãwã-ò. Inatxi hãwã-ò iòhòmy, Betabaji, Betÿnia-wana. Kia-ò Oliveira hãwãlò roire. ² Jesuisi rarybere: —Kaiboho boikre kowa hãwã-ò. Kowa-ò birònykreu jumentinho mahabenykre. Moheka ityre rariaõlemy ratximyhÿre. Bieseke, wadee bididyke. ³ Inyõ adeeremy rarybekeki: —Aõhekremybo idi atxitenyteri. Tahe tamy marybebenykre: —Wanyrÿ tuu rurureri. Ixityre kaò kidiòkesedÿÿnykre. ⁴ Tahe hãbu roire. Jumentinho ryro hetoijò-ki ritisanymy rÿimyhÿ. Tai riesere. ⁵ Kia hãwã mahãdu rarybere: —Aõherekibo jumentinho kaiboho tetatenyta. ⁶ Tai tiiboho Jesuisi rybe tamy riwahinyra. Tai hãwã mahãdu jumentinho riwahinyre. ⁷ Tahe ridyrenyre jumentinho Jesuisi-ò. Tiiboho tatyreny ritidirenyre jumentinho tyremy. Tiiboho risÿnyrenyre Jesuisi ityre-ò. ⁸ Ijõboho tahe

horerule ritidire ryromy, ijõ tahe tauwõhi ryromy ritidire ityre rariakemy. ⁹⁻¹⁰ Ihewo ludu, iko ludu rawyhyrarõnyreri, tule ryrereri: –Tii heka wowydyna rare. Tii heka Wanyrỹ niwesekemy naderi. Wowydyna rare iny labie Davi Iòlòna. Kai Iòlòna kanakre. Wyhyrarò biu-txi kodoholakre.

¹¹ Kia wese Jesuisi ralore Jerusalẽ-ò. Dohodỹỹna heto-ò ralore, ibutumy retehere, idi tahe ròhõnyre txiorotyhyreki. Tahe Betỹnia-ò roirenyre.

¹² Ijõ txu biòwamy tahe Betỹnia-ribi rexitarenyreu tahe tii rama rahure. ¹³ Òwòru figueira rademy robirenymy irehe-ribi. Tahe tamy ritehemynyreu iraty-ki raharenyõlere, aõmyreki figueira raty bededỹỹnanamy aõkõ bede rỹimyhỹre urenana. ¹⁴ Òwòru figueira-ò Jesuisi rarybere: –Tiu heka moõ araty ritòõtyhy. Tahe ierydỹỹna roholare.

¹⁵ Tahe ritehemynyrenyreu Jerusalẽ hãwã-ò. Tahe Jesuisi dohodỹỹna hetowo-ò ralore. Tahe kia-ribi aõna aõna-di rohonymyhỹre mahãdu, õbradu mahãdu diteònyde. Tahe nieru wibydỹỹdu mahãdu, òwòrubesedỹỹ-di Jesuisi rehure. Bòtòe dinodu mahãdu rynana-di Jesuisi rehure. ¹⁶ Inyõ heka ritxyydỹỹnyõlere dohodỹỹna hetowo-ki. ¹⁷ Rierynanymyhỹre tahe tamy rarybere: – Raridỹỹõlemy aõbo rỹireri:

Waheto kõaõboka inatyhymy ibutumy iny wixira wixira dee ixitòedỹỹna hetomy rỹirakre. Waheto tewinytenyete wasidu hetowesele.

¹⁸ Bede ywina erydỹỹ mahãdu, Deuxu aõmysỹdỹỹdu wedu mahãdu roholarenyreu, ròhõtynyrenyreu: –Timybo inyboho Jesuisi

rubudỹmy rokiwisỹnykre. Tiiboho
ruberumyhỹrenyre iny sōwemy dori bede
riòtiinymhỹ ibedeerydỹnaren-yki.

¹⁹ Txioromy dehemynydeu, tiiboho
rexitarenymhỹre hãwãhãkỹ-ribi.

²⁰ Txu ròhòny-di, rehemynyrenyre òwòru
figueira-ò. Tiiboho robirenyre rarubumy rỹireriò,
taru-wana, tararoti-wana. ²¹ Pedro ixi-txi tōhōti
reare tahe rarybere: –Erydỹdu, betehe inihe
aõma òwòru figueira rarubumy rỹire arybebina-di
tamy tarybetaki. ²² Jesuisi dirawyònyde: –
Kaiboho Deuxu bityhynymhỹbeny. ²³ Inyõ
rarybekeki kaa bede ratòòhòkỹ-ki: –Kai myike,
adi adehu rỹikre berohokỹ-ki. Tahe irybe heka
kedelekre. Tai inyõ rityhynykeki, tumy heka
kedelekre. Tahe uritere iseõdỹỹõmykre urile
bityhynykre, irybe heka kedelekre. ²⁴ Iurenana
adee ararybekre: –Aõtxile aõ bexitòenykre, kia
heka bitakre. Bityhynykeki, inatyhymy bitake.
²⁵ Kaiboho textìenytenyteri wana aõbo inydee aky
reamyhỹre kia biixãwididỹnymhỹke ratximyhỹre,
Deuxu dori riixãwididỹnyke aòrarureny-ribi. ²⁶ Kai
iny wixira òraru biixãwididỹnyõkeki, boo biu-ki
ratximyhỹre aòraru riixãwididỹnyõkre.

²⁷ Tiiboho ixityre doide Jerusalē hãwã-ò.
Ririranyhỹrenyreu dohodỹna hetowo-ki, bede
ywina erydỹ mahãdu, Deuxu aõmysdỹdu
wedu mahãdu, matuari mahãdu tamy doide.
²⁸ Tiiboho tamy ritỹraxirenyre: –Mowe ateòdỹdu
kia aõna aõnamy tatỹnymhỹte. ²⁹ Jesuisi
dirawyònyde: –Adeereny tule araỹraxikre.
Kaiboho bidiwawyònykeki, tahe jiarỹ akoreny

ỹraxina arelyykre, aõrurudibo aõna aõna rewinymyhỹre. ³⁰ Tahe Jesuisi ritỹỹraxinyre: —Ratyusebedỹỹna, Joaõ hõrõ, kia heka tiribibo nade, biu-ribi ada hãbu mahãdu-ribi. Kia manarybeke. ³¹ Tiiboho widee rarybera: —Biu-ribi inyboho raryberenykeki, tai tii rarybekre: —Aõherekibo tahe tii tetyhynytenyõte. ³² Hãbu-ribi inyboho raryberenykeki, iny aruberumyhyrenykre. Ibutumy iny rityhynyre Joaõ heka Deuxu rybedu raremyhỹ. ³³ Tai tahe tiiboho raryberenyre: —Inyboho reeryõrenyre. Tai tahe Jesuisi rarybera: —Hebo, jiarỹ adee arelyyõtyhy modeòdỹdubo jiarỹ waxyireri.

12

¹ Iribi tahe Jesuisi tamyreny ijyy-di rierynanymyhyre: —Hãbu uva oworuõ wese ròbròre. Tahe riõtitynyre. Tahe hãloo riare oworuubetya-ki, ruỹdỹỹnyny. Tahe utò riwinyre. Idi tahe rihuòtere hãbu mahãdu-ò. Tahe rexitare tasỹ-ribi ijõ bede-ò. ² Tahe bederatysiredemy bededỹỹnana rehemynyreu, iwedu teòdu riteònyre bederaty ritakemy. ³ Huòtedu mahãdu teòdu rimyrenyre, rihetenyre tahe riteònyre ixihyykemy. ⁴ Ixityre oworuwedu teòduõ riteònyre. Kia heka irati rihetenyre ta tamy rawobinarybenyre. ⁵ Ijõ riteònyre. Kia heka rirubunyrenyre. ⁶ Tahe oworuwedu iriòre sohojilere, tahe iluumy raremyhỹ ihewomy tii riteònyre. tahe wedu rarybere: —Wariòrele heka tiiboho rityhynyrenykre. ⁷ Kia huòtedu mahãdu widee raryberenyre: —Kia heka wedu aõna aõna tarasadu rare. Rikirubunykre tahe

iaõna aõna inydeerenykre. ⁸ Tahe rimyrenyre idi rirubunyre tahe idi rehurenyre oworu-ribi.

⁹ Jesuisi ritỹraxyre: –Aõhebo tahe oworuwedu rotỹnykre. Tii kodoikre huõtedu mahãdu hudumy, tai tahe oworu riwahinykre inywixira-ò.

¹⁰⁻¹¹ Ritina-di aõbo tariaõletenyte kia ryberiti:

–Mana-di hetowidỹdu rehura. Kia mana heka hetohãtxi-ki ritidimy doide. Kia heka Wanyrỹ riwinyre kia iny ruereny dee aõna aõna nihikỹ rare.

¹² Tai ijohonadu mahãdu Jesuisi mynymy ratx-imyhỹ tii dori rieryre ixidee lau Jesuisi ijyymy relymyhỹre. Tiiboho ruberurenyre iny sõwehekỹ lau. Tahe rexitarenyre, rexixãwidinyre.

¹³ Idi riteõnyrenyre Lahi rybe-di erydỹdu mahãdu, Herodi mahãdu-wana tamy imynamy irybe-ki. ¹⁴ Tiiboho rarybere Jesuisi-ò: –Erydỹdu, jiarỹboho araerymy adi watxiwãhãrenyre kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanyamahãte. Tahe tiiboho ritỹraxyrenyre: –Awire aõbo ada ibinare aõbo nieru rawahinyhỹre bede dinodu-ò. ¹⁵ Timybo tahe, rikiõwyny aõbo ada aõkõre aõbo. Jesuisi rierymyhỹre tõhõtinanareny, tahe ritỹraxyra: –Aõherekibo kaiboho tiwaurihitenyteri. Wadee womati nieruõ bidiwy waitxerenamy. ¹⁶ Tahe tamy diwydenyde. Tahe tii ixityre ritỹraxyra: –Kawe moõ tyytarasana rare, katahe moõ tyyritina rare. Tiiboho dirawyõnyde: –Kiahe bede dinoduhõrõ rare. ¹⁷ Jesuisi rarybere: –Hỹdebo, bede dinoduhõrõ tahe tamy biwahinybeny tule

tahe Deuxu aõna aõnahõrõ tamy biwahinybeny. Tiiboho bedede riõtiniyrenyre.

¹⁸ Saduseu mahãdu tamy nade. Kia heka iny rubu-ribi rexixamy aõkõre-riki rierynanyhỹre. Tiiboho ritỹỹraxinyre Jesuisi: ¹⁹ –Erydỹỹdu, Moisesi raritinyra bedede ywina-di: –Hãbuõ rurukeki, tahãwyy iriõre ijõdiõkeki, tahe kia hãwyy tahãbu seriõre-wana roike. Iriõredikre taseriõre rubuõwymy roikre. ²⁰ Seriõre debõinatxi reurõmy raremyhỹ. Juhuu ijõ roire hãwyy-wana. Tahe tii rurure iriõreõlemy. ²¹ Tahe ihewo ludu iseriõre wytese-wana roire. Tii rurure iriõreõlemy. ²² Ihewoludutyhy tule ibutumy roire wytese-wana, tahe ituerenyre iriõreõlemy. Irõòbymy tahe hãwyy tule rurure. ²³ Ixixanau tahe mohãbubo tuu rarekre. Ibutumy dori wytese-wana roire. ²⁴ Tai tahe Jesuisi tamyreny rarybere: –Kaki kaiboho teõsamy toite aõma ritina teeryõtenyteki. Tule Deuxururu teeryõtenyte. ²⁵ Ixixanau heka moõ roiõtyhy. Ibutumy iny ýju wese rarekre biu bedede-txi. ²⁶ Kaiboho aõbo tatyryritinytenyõta iny rubu-ribi kedexixakremy. Kia heka raritinyrny rỹire Moisesi tyyriti-ki, òwòrusõmo ijyy-ki rỹimyhỹ. Iwese Deuxu rarybere Moisesi-ò: –Jiarỹ heka Abraõ Deuxu rare. Ijai Deuxu rare. Ijaò Deuxu jiarỹ rare. ²⁷ Jiarỹ heka rubu mahãdu Deuxu aõkõ rare, tahe iru mahãdu Deuxu jiarỹ rare. Kaiboho teõsamy toite.

²⁸ Bedede ywina erydỹỹ mahãduõ nade ijohonamy. Tahe tiiboho widee raryberenyroholareu, Jesuisi tamyreny rirawyõnywihikỹreu, tahe tii Jesuisi-ò ritỹỹraxinyre: –Tibo rybe bedede

ywina juhuure. ²⁹ Jesuisi rirawyònyre: —Ka heka juhu ludu rare: —Boholake Israeli mahãdu, judeu ijoi mahãdu wahe. Wanyrỹ, iny Deuxu sohojile rare. ³⁰ Kia aDeuxu luuke ibutumy awo-ribi, aumytytyby-ribi, ibutumy aruru-ribi. ³¹ Ka heka ihewo ludu rare: —Kai abireluduluuke iwese ixiluuke wese. Ijõ bede ywina heka ka ratyreõre. ³² Tahe Bede ywina erydỹĩ mahãduõ rarybere: —Inatyhymy kai tarybeta. Deuxu heka sohojile ratximyhỹre. ³³ Ibutumy awo-ribi iluukemy. Ibutumy aruru-wana iluukemy. Tule ibutumy aeryna-wana iluukemy. Iwese kai ixiluure wese, abire ludu mahãdu luukemy. Kia heka ibutumy iròduxiwelloo ratyre rare. Ibutumy wahidỹĩnaloodỹĩna ratyre rare. ³⁴ Jesuisi rieryre kia hãbu rirawyònywihikỹre tai tamy rarybere: —Kai heka Deuxu Íòlòna-ribi irehemy aõkõ. Tai tahe ibutumy ilau ruberure tỹĩraxidỹĩki.

³⁵ Jesuisi dohodỹĩna heto-ki rierynanymyhỹreu, rarybere: —Timybo Bede ywina erydỹĩ mahãdu rarybemyhỹre Kristu Davi riòre raremy. ³⁶ Davi rarybere aõmybo Deuxu Tyytybytyhy tamy narybedemy: —Wanyrỹ rarybere Wanyrỹ-ò: —Bodony warurunawe-ribi. Txiòhe rare, aòludu awarawo-txi aritidikre. ³⁷ Tahe Davile Wanyrỹ rininire. Timybo tahe Davi iriòremykre. Tahe iny sõwemy deysana-di roholarenyre.

³⁸ Tii rierynamyhỹreu, rarybera: —Bexiemyhỹbeny bede ywina erydỹĩ mahãdu lau. Tiiboho heka tyyrehe-di riraluurenyre. Tiiboho heka rybedỹĩluurenyre hãwãhãkỹ riranaki. ³⁹ Dohodỹĩna heto-ki juhurnana luurenyre. Tule ta anarỹĩ rỹiwana, juhu rynanadile tamyreny

awire. ⁴⁰ Tiiboho tule wytese urimynydu aõna aõna ritarenyre. Ixitòedỹna rehehekỹ rexitòenymyhỹrenyre. Tiiboho heka aõnihikỹmy aõhòkỹmy dỹnana riòwynyrenykre.

⁴¹ Jesuisi retehemy rỹimyhỹ dohodỹna heto nieruhyna ratya-txi. Tii retehere timybo iny sòwemy tanieru-di tamy rehumyhỹ. Tahe ityhynihikỹ tamy sòwemy nieru-di rehure. ⁴² Tahe nade wytese iaòkòdu mahãduõ tii rare. Tii inatxi nieru sòmo-di rehure. Tanieru tahe nierukonana rare. ⁴³ Jesuisi ryryre taerydỹna-ò: –Inatyhymy adee araybekre. Kowa heka wytese nieru-di rehure ibutumy iny wixira ratyre. ⁴⁴ Kaa mahãdu ibutumy nieru-di rehure rauhenyredile. Tahe wytese idi rehure ibutumy tanieru-di rexihumy taumy-ribi idi rehure.

13

¹ Dohodỹna heto-ribi ròhònyreu, ierydỹna tamy rarybere: –Erydỹdu, beteheke inihe mana nihikỹ-ò, hetohokỹ-ò. ² Jesuisi rirawyònyre rarybere: –Kaiboho betehebennykre heto nihikỹ-ò. Kia heka mana ijõ wityre-ki rỹiõtyhy, ibutumy heka kedejuxunykre.

³ Oliveira bederatòhòkỹ-ki tii ronyreu dohodỹna hetoko-txi, tahe Pedro, Txiau, Joaõ, ibutumy tamy doide rỹraxyimy iny-ribi irehemy.

⁴ Wakoreny bedelyyke, tiubo kia kỹnyikre. Ibutumy aõna aõna kỹnyikre wana tibo iny bedeerynyrenykre. ⁵ Jesuisi rexiranyre tamyreny rarybere: –Kaiboho anaitxenanydenyheny lau bexiebennyke. ⁶ Sòwemy dori roikre wanimy rarybemy rarekre: –Jiarỹ dori Kristu rare.

Tahe iny sōwemy anaitxenanykre. ⁷ Kaiboho wounarybe-ò, aōbinarybe-ò, boholakreu, breburenyōmykre. Kia heka kanakremy ratximyhÿre. Urile bededÿÿnana ikonanamy aōkōhyylemyhÿre. ⁸ Uritere inylahinareny, ijōlahinareny-wana wii kidiaōbinanykre. Tule iòlòna mahādu ijō iòlòna mahādu-wana wii kidiaōbinanykre. Bede bedesu ijō hāwā-ki kanamyதாகre. Tahe aōkōre rama kedeakre. Kia heka juhu aōhōkÿmydÿÿnana rarekre.

⁹ Kai bexiekre anamydenyheny lau. Tiiboho anawahinydenykre aòludu wedu-ò, iòlò-ò. Tiiboho anahatenydenykre dohodÿÿna hetowo-ki. Kiabohoko-txi wadee kaiboho kedelyykre inatyhymy aōna aōna rÿiremy. ¹⁰ Rybewihikÿ juhū ibutumy bede hāwā hāwā-ò kiditÿnydÿÿnykre. ¹¹ Tiubo aradyrenykeu, urile nohōtiōmy aōbo kaiboho marybebenykre. Kiautyhye aōmybo rarybekremy bierykre. Kia tahe marybekre. Kai dori aōkō tarybemahāte, Deuxu Tyytybytyhy tahe rarybemyhÿre. ¹² Seriōre seriōrele wii kidirubunykre. Tyby heka tariōre kidirubunykre. Uladule tadi, tyby kidirubunykre. ¹³ Ibutumy heka iny iy kedeakre wani òraru-ki. Kia heka ikonana-ò riijekreu, taumy tarasanakre.

¹⁴ Aōna aōna binahakÿ kanakreu, ibutumy rahukemy. Tiiboho kanakeu itxinonana-txi aōkō rarekemy, kaiboho mahenybenykre bederatòhòkÿ-ò, Judeia hāwā hāwā-ki ratxikeki, mahenybenykre. ¹⁵ Inyō hetotyre-ki ratxikeki, urile ròteōmy aōna aōna wydysymy. ¹⁶ Inyō bedero-ki ratxirekeki, uritere òkeseōmy tyy òrysymy. ¹⁷ Kobexe heny hāwy y bòtòmy

rỹira, tule hãwyy tariòre ritònymy rỹira.
¹⁸ Bexitòenykre kia kanaheny bededỹỹnana sirau.
¹⁹ Aõhõkỹmydỹỹnana kanakre tiu heka tuuõre. Juhule Deuxu bede riwinyreule wiji tuu yrubule bede roimyhỹre. Tiu heka kiamy bede roiõtyhy aõhõkỹmydỹỹnanamy. ²⁰ Deuxu bede iòhòmy rirawetyyòròkeki, moheka irumy ròhònyõtyhy.
²¹ Inyõ adee rarybekeki: –Kaki heka Kristu ratxireri. Kowa-ki ratxireri. Uritere ityhydỹỹõmy.
²² Sõwemy Kristu kanakre, urile Kristu inatyhy aõkõ rarekre. Tule Deuxu rybedỹỹdu kanakre. Kia Deuxu rybedỹỹdu inatyhy aõkõ rarekre. Tiiboho heka bedeõby riwinykre tule bede eryna. Deuxu hõrõ riitxenanykemy inatyhymy kõaõboka.
²³ Kaiboho warybe biyrubunykre. Adee ibutumy juhuule reòbitinyre.

²⁴ Idi webòhòna rỹira txuu, aõhõkỹmydỹỹnana itue-di, txuu heka rurunykre. Ahãdu tule rurunykre.

²⁵ Taina heka kedejuxunykre biu-ribi. Biururu raòweòwenykre.

²⁶ Iny retehekre Deuxu Riòre dehemyynana-di. Biurawetyky-ribi kodobehekre. Kia heka lobixina kanabòtòrananykre. ²⁷ Tahe taỹju kiditeònykre tawedu ijoihõrõ butudỹỹmy.

Kidibutunykre ibutu bede bede konana-ribi, tule ibutu biukonana-ribi.

²⁸ Tahe figueira òwòru-ribi erydỹỹna bierybenykre. Tahe iruru raixinykreu tahe, txiru ròhònykreu, tai tahe bierybenykre wyra iòhòneri. ²⁹ Tule kia aõna aõnamy bobibenykreu, tii iòhòlereri. Ijòkile wese nyide. ³⁰ Inatyhymy adee ararybekre, kia wijinabòdu itueõtyhy aõna

aõna rÿikre hãrele. ³¹ Biu, bede-wana ituekre, tahe warybe itueõtyhy. ³² Moõ heka rieryõtyhy tiubededÿÿnanamybo tii kòdòòsekre. Tule ÿju biutxile rieryõre. Tule iriõre rieryõre. Tule tyby sohojile rieryre.

³³ Kaiboho bexieke, beteheke. Kai dori teeryõtenyte tiubededÿÿnanamybo kòdòòsekre. ³⁴ Kedehemynykremy dori iwese hãbu tÿimy rarewese tii rexitareu, ririre tadeòdu. Tadeòdulemy tule ridyre itxeredu rethemyhÿkemy. ³⁵ Tahe betehe inihe teeryõteri dori tiubo kanakre heto wedu, txioromy ada ruwetya aõbo, ada hãnie hãbu rry-di aõbo, ada txumy aõbo. ³⁶ Betehe inihe iny araraòõlemy tii rehemynyre aki rahakre atÿi-ò. ³⁷ Aõna aõnamy jiarÿ rarybemyhÿre, rarybera ibutu-ò: —Bijebeny.

14

¹ Kia-ribi inatxi txumy riuhenymy ratxireri anarÿÿ kodohònykremy. Kia anarÿÿ wehityhynamy heka iny ratya-di reare. Tule orotxu anarÿÿ kia ròhònyre. Tule Deuxu aõmysÿdÿÿdu wedu mahãdu tule bede erydÿÿdu mahãdu Jesuisi rimyky ratxireri idi rirubunykemy. ² Tiiboho rarybemyhÿrenyre: —Kiahe aõkõre anarÿÿ rÿireriu, iny sòwemy inydeereny kana aõbinanyheny.

³ Jesuisi Betÿnia hãwã-ki ratximyhÿu, Simaõ tyybina heto-ki ratximyhÿre. Jesuisi òwòru besedÿÿbire-ki roimyhÿ. Tahe hãwyy aderòna òwynihikÿ-di lÿnyrena wihikÿ-di nade. Tai ihyna riwebòhònyra tahe Jesuisi ratityre-ò ritxiwira. ⁴ Inyõreny rexiykaranyke. Tahe widee rarybera: —Aõherekibo aderòna rahura. ⁵ Inywitxira

tahe iòwynykewi sòwemy nierумы kia-ò. Kia nieru-di tahe iny aòkòdu-ò rawahidỹnykre. Tahe tiiboho rexibynyreri hãwyy dee. ⁶ Tahe Jesuisi rarybere: –Txiòhe rare, uritere ixibydỹõmyke. Tii heka aòwihikỹbo wadee riwinyra. ⁷ Kiamy aõu aõu iny aòkòdu rỹikremy. Aõule heka tamy aòwihikỹ biwinybenyke. Jiarỹ tahe, aki aõu aõu aòkòlekre. ⁸ Tii heka rexikonananymy ròwidỹre. Aderòna-di watyre ritxiwire wabede-ò jiarỹ raõule. ⁹ Inatyhymy adeereny ararybekre. Aõtxile Deuxu Rybewihikỹ iny relyykre. Kia-ò kahãwyy ijyymy relyykre, ibutumy iny idi ròhõtynykremy aõbo riwinyredi.

¹⁰ Tahe Judasi Isariò Deuxu aõmysỹdỹdu-ò rara Jesuisi tamy rawahidỹkemy. ¹¹ Tiiboho tamy roholarenyre, reysare. Tahe tamy nieru riwahinykemy riurenanyre. Tahe Judasi riijemyhẽre aõu aõu bedewihikỹ tamyreny riwahidỹnykemy.

¹² Juhu orotxu anarỹtxure budoeni xiweloo rirubuny rahudi tahe Jesuisi erydỹna mahãdu tamy rarybere: –Títxibo anarỹ rỹsỹnamy biroxikemy atxiteri. Jiarỹboho kowa-ò aroikre. ¹³ Tahe Jesuisi tamy rarybere: –Kaiboho boikre hãwãhãkỹ-ò. Tahe hãbu-wana wii biòbynykre butxi-di riwyreriò. Tahe tii biheludunyenye. ¹⁴ Aõtxile hetoõ-txi ralòke, kaiboho marybebenyke hetowedu-ò: –Waerydỹdu rarybera: –Titiwexe anarỹ rỹsỹna arirỹsỹkre waerydỹna-wana. ¹⁵ Tii heka adee kiditeòsinykre hetowowitxiraõ biu-txi. Ibutumy rexihumy rỹire inydeereny. Kowa rỹsỹna inydeereny biywinykre. ¹⁶ Tahe ierydỹna

rexitare. Roire hãwãhãkỹ-ò. Tahe ròhònyre iwese Jesuisi relyyre wese. Tahe ibutumy rexihurenre anarỹ-ò.

¹⁷ Txiorou Jesuisi nade taerydỹna waòinatxi reurò-wana.

¹⁸ Tiiboho òworubesedỹ riroximahãu, Jesuisi rarybere: –Kaiboho wawana teroxitenyteri sohojiò biwawahinykre.

¹⁹ Tahe urihimyò rexiranyre rabadewomy. Tahe widee raryberenyre: –Jiarỹle heka ariwahinykre.

²⁰ Tii rirawyònyre: –Kaiboho, waòinatxi reurò mahãdu sohojiò. Kia mahãduò orotxu-di wawana rebenymyhỹ besero-ki.

²¹ Inatyhymy Deuxu Riòre Hãbutyhyhykỹ rakre iwese iritina rỹirewesele. Kobexeheny kowa hãbu heka kidiwahinykre. Tamy iny awire kedeaòlede.

²² Tiiboho riroxireriu, Jesuisi orotxu rimyreu, raorore, rexitònyre, tahe tamyreny riwahinyre. Rarybere: –Ãhãxe, kia heka waumy wese rare.

²³ Tahe vỹhynamona rimyre, rexitònyre, tahe tamyreny riwahinyre. Ibutumy ibute bute iribi tuu riònyre.

²⁴ Tamyreny rarybere: –Kia wãhãlubu wese rare. Kia hãlubu heka rybe tỹmyra ywidỹna hãlubu rare. Kia inyboho kidinohõtijuadenykre. Wahãlubu heka kedeljuxunykre iny rabòrònihikỹ dee.

²⁵ Inatyhymy ararybekre: –Ariòòtyhy heka òtetibederatyruibe tỹmyra ihyy tahe tiutxumybo Deuxu Iòlòna-ki ariòkre.

²⁶ Deuxuwimy rawinyrenyreu, tahe rexitarenre Oliveira bederatòhòkỹ-ò.

²⁷ Jesuisi tamyreny rarybere: –Kaiboho ibutumy wijirumy biwaribenykre. Kia heka iritina rỹire.

Itxeredu tahe riròrenykeki, budoeni rahenykre.

²⁸ Tahe rubu-ribi adexixakreu, arakre akomy Kalileia-ò. ²⁹ Pedro rarybera Jesuisi-ò: — Ibutumy ararikeki, arariõtyhy. ³⁰ Jesuisi tamy rarybera: —Inatyhymy ararybekre. Wijirumy hāniehābu inatxi kydyrykreule, kai iny witzira-ò biwatxiõnykre inataõ bedemy. ³¹ Tahe Pedro rarybera tarurutyhymy: —Aõkõre, aratxiõnyõtyhy, ihārele tahe awanale arurukre. Ijõ mahādu tule kia wese rarybera.

³² Tahe roire Kesemani hāwāmy ninadu-ò. Taerydỹna-ò rarybera: —Biwaraõmy bonykre kakile. Kowa-ò arexitõenykre. ³³ Tii ridyrenyre Pedro, Txiau, Joaõ-wana. Jesuisi rexiranyre rabadewomy ihyy rexitõenyre. ³⁴ Tahe tamy rarybera: —Watyytyby heka rabadewomy ratxireri rubuhyy-ò. Kaki bonykre biijemy. ³⁵ Tahe iko-txi urihimyò rareu, resere. Rexitõenyre: —Waha, adee arexitõenykre. Adee awikeki, kia òraule tiu waròteõna. ³⁶ Tii rarybere: —Waha, adee ibutumy isiraõre. Kia bemona inye waròbi bitake inihe. Tahe wadeewi wadeewi-ki aõkõ watxireri, tahe adeewi-ki. ³⁷ Tii rehemynyre tai rahare rōrōrenymy roireriò. Rarybere Pedro-ò: —Simaõ, Tarõteri aõbo. Biijeõtyhy sohoji òramy bededỹnana. ³⁸ Biijebenykre, bexitõenykre, uritere rutaanamy ròteõmykre inatyhymy atyytyby irurudire tahe ade iruruõre. ³⁹ Tahe Jesuisi ixityre rare rexitõenyre ixiwesele. ⁴⁰ Ròsereu, ijõ-ki rahare rōrōmy ixiwesele, irurureny rautxienymyhỹ dori. Tiiboho rierykõre idi rirawyõnyrenyre.

⁴¹ Tahe ixbyble ròsere tahe rarybere: –Morõbeny bexielehynybeny. Òra iòhòreri. Kia heka Deuxu Riòre Hãbutyhyhykỹ kanawahidỹkre òrarudu mahãdu-ò. ⁴² Bitỹmynybenyke, rokoireny, walòsedỹdu iòhòmý rareri.

⁴³ Tii rarybereriu, aõwesele Judasi nade. Kia heka waòinatxi reurò mahãduõ rare. Tii-wana doide hãbu mahãdu mayrehe-di, òhòtemy debòna. Kia heka hãbu mahãdu doide matuari mahãdu-ribi, Bede ywina erydỹ mahãdu-ribi, Deuxu aõmysỹdỹdu wedu-ribi. ⁴⁴ Lòsedu tamyreny juhúu bede eryna riwahinyre. Kawese heka rarybere: –Kowa heka inyõ-ò aruwokre, tii heka hãbu rare. Bimybenykre, birarenybenywihiỹkre. ⁴⁵ Judasi rehemynyrenyreu, tahe rarybere: –Wedu, wedu. Tahe tamy ruwore. ⁴⁶ Juda ijoi Jesuisi rimyra. ⁴⁷ Kia ijoiõ mayrehe ritare tahe Deuxu aõmysỹdỹdu wedu deòdu nohòti riorore. ⁴⁸ Tahe Jesuisi dirawyònyde: –Kaiboho mayrehe-di tiwaòrynyteri wasidu-wesemy aõmy, òhòte-di. ⁴⁹ Jiarỹ tahe dohodỹna heto-ki watximyhỹ txuõ txuõlemy adeereny araerynanywãhãdenyde. Kowa-ki heka tiwamyõlemyhỹtenyde. Tahe aõbo iritina-ki rỹireri, kia heka kỹnyikremy. ⁵⁰ Ibutumy ierydỹna mahãdu ririrenyre, rihenyrenyre.

⁵¹ Kia heka hãbuõ riheludunymyhỹ tyy tayredile rexytynny tiiboho ridyrenyre. ⁵² Tii tahe tyy ririre tahe rahenyre tadelemy.

⁵³ Deuxu aõmysỹdỹdu wedu-ò tiiboho Jesuisi ridyre. Bede ywina erydỹ mahãdu, matuari mahãdu-wana ributunyre. ⁵⁴ Pedro

riheludunyre irehetyhytyhymy. Rehemynyre Deuxu aõmysÿdÿÿdu wedu heto-ò. Tai tahe ixitòteenymy heòtywera-ò rorukumyhÿ heto itxeredu mahãdu-wana. ⁵⁵ Deuxu aõmysÿdÿÿdu mahãdu wedu, tule dohodÿÿdu mahãdu alobixidu riijemyhÿre aõlemy Jesuisi òludu relymyhÿre, Kia òraru-ki rirubunynrenkemy. Rahaõre. ⁵⁶ Sõwemy iny ruimy relymy rÿimyhÿ. Iruinarenymy wiribi hitxi hitxilera. ⁵⁷ Ijõ mahãdu rÿimyhÿre relyyrehãre ruimy rarybere: ⁵⁸ — Inyboho irybe-ò roholarenymy: Jiarÿ heka dohodÿÿna heto ariixãwididÿÿnykre kia heka hãbu iwidÿÿna rare. Txu inataõ-di ijõ ariwinykre iwidÿÿnaweseõre. ⁵⁹ Kia heka aõmybo tuu relyyrenyremy irybe wiribi hitxi hitxire. ⁶⁰ Deuxu aõmysÿdÿÿdu mahãdu rÿire inysõwetya-txi. Tii Jesuisi ritÿÿraxinyre: —Kai aõbo biwarawyònykre aõmybo relyyrenyneri adee òludumy. ⁶¹ Tii rerawyònyòlere ixyby tahe Deuxu aõmysÿdÿÿdu mahãdu ritÿÿraxinyre: —Kai aõbo Kristu tate, Deuxu wityhy riòre. ⁶² Jesuisi rarybera: —Jiarÿ heka. Kaiboho betehebenykre

Deuxu Riòre Hãbutyhyhykÿ Deuxu rurunaweribi-ò ronyneri. Kaiboho tii betehebenykre Deuxu Riòre Hãbutyhyhykÿ biuwetyky-ribi naderi.

⁶³ Deuxu aõmysÿdÿÿdu wedu ityy riykara idi rarybera: —Aõherekibo ijõ alobixidumy iny rururenryneri. ⁶⁴ Kaiboho taholatenyta aõbina binalemy rarybereriò aõmybohe kaiboho tahõtinyinmyhÿtenyte. Ibutumy heka tawo riraòhòrenyry rubudukremy. ⁶⁵ Tahe ijõ ityre rybeximy rarutaara rexiruehetynyre

tahe tule rihetenyre. Tahe rarybere: –Mota làhà arahâtenyra. Idi tahe heto itxeredu tule rihetenyre.

⁶⁶ Pedro heka ratximyhỹ bedeube-ki tahe ijadòma dehemynde, Deuxu aõmysỹdỹỹdu deòdu. ⁶⁷ Pedro rexitòteenymyhỹ heòtywera-ò tahe ijadòma tamy retehere. Tahe rarybera: – Kai tule Jesuisi Nazare ludu-wana atximahâte. ⁶⁸ Tahe tii rexitxiõnyre: –Jiarỹ reeryõre aõmybo kai tarybeteri. Tahe Pedro hetowo-ribi ròhònyre. ⁶⁹ Ijadòma ixyby ixyby itxeremy rarybere kowa ijoi-ò: –Kowa heka tii mahãduõ rare. ⁷⁰ Tahe tii ixityre rexitxiõnyre. Ixybyle kowa ijoiõ Pedro-ò rarybera: –Inatyhymy kai ijõ mahãduõle tate. Kai dori Kalileia mahãdu tate. ⁷¹ Tii inatyhytyhyrybemy rarybera: –Jiarỹ reerykõre hãbumy tarybetenyteri. ⁷² Tahe hãnie hãbu ryryra, inatxi hewoludumy. Ta Jesuisi rybe-txi Pedro tòhòti reare. Iwese Jesuisi rarybere: – Inatxi hãnie ryrykredi, ihewoludukomy ryrykre, wadee bedexitxiõnykre inataõmy. Pedro tahe iribi rexitareu, rahinyre.

15

¹ Txuu reareu, Deuxu aõmysỹdỹỹdu wedu, matuari mahãdu, Bede ywina erydỹỹ mahãdu ibutumy ributumy. Tahe Jesuisi ritaataare tahe ridyrenyre Pilato-ò. ² Pilato Jesuisi-ò ritỹỹraxinyre: –Kai aõbo judeu iòlò tate. Tii rirawyònyre: –Kai ka tuu tarybeta. ³ Deuxu aõmysỹdỹỹdu mahãdu wedu rarybere Jesuisi aõna aõna awimy aõkõ riwinyre. Tahe Jesuisi riwawyònyõhyllere. ⁴ Pilato ixybyle rỹỹraxire: –Kai birawyònyõtyhy aõbo. Kai

aõbo taholaleteri aõmybo tiiboho autédé-ò raryberenyneri. ⁵ Tahe Jesuisi rarybeõhyylere tahe Pilato urile bede riòtiinymyhỹre.

⁶ Kia heka juhUU iny deòwarixina rare hãbu ròteduõ ritakemy anarỹỹtxuu. Aõtxile iny tamy rexitòdenyke. ⁷ Ròtenawo-ki raremyhỹ inyõ Barabamy ninadu-ki. Tii tahe inywixira aõbinadu mahãdu-wana ratximyhỹ. Kiamy inydinodu òraru-ki aõbina rỹireki, tii iny rirubunyre. ⁸ Iny sõwehekỹky-ki doide, tahe rexiranyre ixitòedỹỹmy: iny deòwarixina kòdòhònykre. ⁹ Pilato dirawyònyde: —Adeereny ariòlòdỹỹnykekõ aõbo ka judeu iòlò. ¹⁰ Tii rieryre dori Deuxu aõmysỹdỹỹdu mahãdu wedu tamy Jesuisi ridyrenyre iwobinanareny lau. ¹¹ Deuxu aõmysỹdỹỹdu wedu inysõwe riixitòedỹỹnyre Baraba riòlòdỹỹnykemy. ¹² Pilato ritỹỹraxinyre ixybyle: —Aõhebo tahe idi arotỹỹnykre. Kaiboho tuu teninimyhỹtenyte judeu iòlòmý. ¹³ Tiiboho rirajuarenyre: —Bitamadỹỹnyke itxeò nihikỹ-ò. ¹⁴ Ta Pilato tamyreny ritỹỹraxinyre: —Aõbina taka riwinyre. Aõhe-wana ixityre rirajuamyhỹrenyre: —Bitamadỹỹnyke itxeònihikỹ-ò. ¹⁵ Pilato inydee aõ riwahinykemy rõhõtinyra, tai ta Baraba riòlòdỹỹnyre. Idi tahe Jesuisi riyhytanymy rahudi, riteònyre itxeònihikỹ-ò riukòrenykemy.

¹⁶ Soldado ridyrenyre heto woube-ò. Tai tahe ibutumy soldado ributumy. ¹⁷ Tahe tyysòborehekỹ-di rityynyrenyre. Tahe ede rataana ritidire ira-ò. ¹⁸ Tahe rirybenyrenyre: —Adee nihikỹre judeu iòlò. ¹⁹ Tahe rihetenyre bòtòre-di irati-ò, tahe ityre rarybexinyre tahe

rỹire tatiowotimy rityhynykemy. ²⁰ Tahe tyysòbore iribi ritara, tahe ityyle tamy ritidira. Inatyhymy ridyrenyre itxeònihikỹ-ò riukòrenykremy.

²¹ Kowa-di rekoarenyre hãbuõ. Simaõ Sireni inire. Kia heka Alexỹdre, Rufu-wana tyby rare. Tii nade bedero-ribi. Tiiboho tahe riitxyydỹnyre itxeò-di retyykemy.

²² Riwyrenyre bederahy-ò Kòkòta ninadu-ò. Kia heka iwitxira rybe rare. Kia heka rubu ratitybyho wese rare. ²³ Tiiboho vỹ riurinyre òwòruburu-wana. Tahe tii tuu riòõlera.

²⁴ Itxeònihikỹ-ò raukòrenymy rahudi tahe ityy wirarea riatyre, tahe ityy-di rarudeòsanyre tibo iny sohoji sohoji ityy riwykremy. ²⁵ Biurasò txu Jesuisi itxeò-ki raukore. ²⁶ Iratya-ki tahe ritina rỹire: JUDEU IÒLÒ. Kia heka iny tuu rarybemyhỹrenyre. ²⁷ Tahe tii-wana inatxi wasidu itxeònihikỹ-ò riherinanyre, ijõ ruruweribi-ò, ijõ hyweweribi-ò. ²⁸ Tahe rotỹnyre aõbo Deuxu ritina-ki rỹire wese: Tii ratximyhỹ òrarudu mahãdu-wana. ²⁹ Iny reareare tara riohowimy rarybere aõbina binamy: –Kobe, kai korihe dohodỹna heto biatykemy inataõ txudile tahe ixityre bidiwinykre. ³⁰ Kaile inyhe bexitakre itxeò-ribi. ³¹ Iwesehyyle Deuxu aõmysỹdỹdu wedu, bede ywina erydỹ mahãdu-wana widee raryberenyre. Jesuisinimy raujõmorenyreri: –Tii iny witxira ritare, tiile tahe rexitaõtyhy. ³² Kristu, judeu Iòlò, bodobeheke itxeò-ribi jiarỹboho arobirenykremy, tai tahe aratyhynyrenykremy. Tule wasidu tii-wana raukòrenyre itxeò-ki Jesuisimy raujõmorenyre.

³³ Txutyeyu ibutumy bede rurunyre. Tahe roire txu kaò resemý. ³⁴ Kiaule tahe Jesuisi rarybeterenyre: –Elòi, Elòi, lema sabatani. Kia heka iwitxira tybe rare. Kia rare: –WaDeuxu waDeuxu, aõherekibo kai tiwarite. ³⁵ Ijoiõ heka tamy roholareu, rarybere: –Tii heka Eliasi-ò ryrereri. ³⁶ Hãbuõ reare bexi ritÿxinyre vïi juberere-di idi tahe ritidire tabòtòrejura-ò. Riwahinyre Jesuisi ritòkemy. Tahe rarybere: –Deinyhe tamy inyhe reketehereny Eliasi kanakremy aõbo inyhe itarasamy. ³⁷ Jesuisi ryrere irariemy idi rurure. ³⁸ Dohodÿÿna hetowetyy raykare inatxi weryna tyymy, biu-ribi, bede-ò. ³⁹ Soldado dinodu Jesuisiko-txi ratximyhÿre. Tahe rurureu, irubumy robire. Tahe rarybere: –Ka heka inatyhymy Deuxu riòre rare. ⁴⁰ Tule hãwyy mahãduõ retehemy rÿimyhÿ irehe-ribi, tówysyreny-ki, Marie Madalena, Marie (Txiause, Jyrese tii rare. Txiau heka Jyje hewoludumy rare.) Salome tule ihÿre ijõ-wana. ⁴¹ Kia heka Jesuisi Kalileia raremyhÿu, tiiboho tahe sówemy iny-wana doide Jerusalẽ-ò.

⁴² Txioromyhe dehemynyde. Wirareasanatxu rare. Kia heka sabadotxukokile rare. ⁴³ Jyje Arimatea hãwã ludu dohodÿÿdu nihikÿõ rare. Tule heka tii riraòmy ratximyhÿ Deuxu Iòlòna. Tii ruberuõlemy rare Pilato-ò Jesuisiumymy ix-itòedÿÿmy. ⁴⁴ Pilato rabedeòtiidÿÿnanyre Jesuisi rurumy roimyhÿdi tai ryrere soldado dinodu-ò. Tai Pilato ritÿÿraxinyre, Jesuisi rurumy roimyhÿdi. ⁴⁵ Soldado rarybereu Jesuisi rurumy roiremy tahe Pilato riteònyre Jesuisiumy Jyje-ò

iwahidỹmy, ⁴⁶ Jyje ritare itxeònihikỹ-ribi tahe ritỹtenyre tyurahãkỹ-di. Idi tahe ritidirenyre mana hãloo wabedewo-ò. Tahe mananihikỹ-di riijõtòbònyra. ⁴⁷ Marie Madalena, ijò Marie Jyjese reteherenyre titxibo tii ritidirenyreò.

16

¹ Tahe nobiutxu, Marie Madalena, ijò Marie-wana ihewoludu Marie, Txiause, Salomese-wana rare. Tiiboho lỹnyrena riòbranyrenyre. Tahe roire Jesusibymy idi rekoakremy lỹnyrena-di. ² Juhutxu semana bededỹnanau txuu deadeule roire wabede-ò. ³ Widee raryberenyre: –Mowexe mana ritakre ijò-ribi. ⁴ Tahe tuu robirenyre. Mana nihikỹ ritamy rỹire. ⁵ Wabede-ò rirònyrenyre, robirenyre weryrybòweselemy rononymhỹ ruruweribi-ò. Ityy urahakỹmy rononymhỹ. Tahe tiiboho bede riòtiinyrenyre ruberurenymy. ⁶ Tii tamyreny rarybera: –Uritere breburenyõmy. Kaiboho aõbo teòrytenyta Jesuisi Nazare ludu. Kia itxeò-ki rurure. Tii aõkõ kaki ratxireri. Rexixara rubu-ribi. Betehebeny inihe tai ritidiraò. ⁷ Makre. Marybekre ierydỹna-ò tule Pedro-ò. Tii rakre akorenymy Kalileia-ò kaiboho tuu lobiximy boikre tuu adeereny raryberemy. ⁸ Tahe tiiboho rihenyrenyre wylemy wabede-ribi ruberumy. Tiiboho moõ heka rarybeõhylerenyre ruberumyhỹrenyki.

⁹ Juhutxu semana bededỹnau Jesuisi rubu-ribi rexixare. Idi tahe juhoo àsitereribile rexitỹnyrenyre Marie Madalena dee. Kia-ribi heka juhuule ritare debò inatxi reurò tyytybybinamy. ¹⁰ Tii

rare Jesuisi-wana raremyhỹ mahãdu-ò. Tiiboho rabadewomy ratximyhỹreny, rahinymyhỹreny. 11 Tamyreny relyyreu iwese Jesuisi tamy rexitỹnynyrene wese Jesuisi irulemy ratximyhỹmy tuu robireke, rityhynyõlerenyre.

12 Jesuisi rexixamy rahudi tahe, iwitxiramy rexisỹnyny inatxi erydỹỹna-ò. Tiiboho heka roimyhỹrenyrene bedero-ò. 13 Tahe dòðsede relyyrenyrene taijoi-ò, tahe tule rityhynyõlerenyre.

14 Tahe waðsohoji reurò erydỹỹna-ò Jesuisi àsitereribile rexitỹnynyrene. Tiiboho riroximyhỹrenyò rexitỹnynyrene. Tahe Jesuisi tamyreny rarybera: —Aõherekibo kaiboho iny wamy robira mahãdu tetyhynyõteri. 15 Kaiboho boibenyke ibutumy bede bede-ò Rybewihikỹ bitỹnynykremy. 16 Inyõ Rybewihikỹ rityhynykeki, idi kidisebenykeki, tii Deuxu ritake. Inyõ rityhynyõkeki, Deuxu ixi-ribi riteònykre iòraru-ki. 17 Kia bede eryna ityhydỹỹdu kidiheludunykre. Tiiboho tyytybybina kiditeònykre wani-ki. Tule heka tiiboho itỹmyra rybe kanarybedenykre. 18 Hemyllala rimyrenyreu, aõhe rotỹỹnyõlere tule rubuna monamy riõkeki, rotỹỹnyõlere. Tiiboho tebò ritidirenykre bina mahãdu-ò tahe riteytenykre.

19 Idi tahe Jesuisi tarybe rahuredi, Deuxu ridyre biu-ò. Tahe ronyre Deuxu ruruweribi-ò. 20 Tahe tiiboho roire ibutumy bede bedemy tai bede ritỹnynyrenyrene. Wanyrỹ riwiòhenanyrenyrene tahe bede eryna-di irybe ixidee rimyrenyrene ihelududỹỹdu mahãdu-ò.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 21 Feb 2024 from source files
dated 29 Jan 2022

55ce0bcd-101e-52a3-984e-847027efe150